

PAGKANG NI GEPANULUSUN

DE KAATAANAN

NI MAKEDEPAT

## Pilgrim's Progress

Summer Institute of Linguistics, Inc.  
Translators

1986

DUPRO

Published  
in cooperation with  
Bureau of Elementary Education  
and  
Institute of National Language  
of the  
Ministry of Education, Culture and Sports  
Manila, Philippines

Additional copies of this publication  
are available from:

Book Depository  
P.O. Box 2270  
Manila 2801

Funds for the production of this publication  
were provided by the Canadian International  
Development Agency and the Alberta Agency  
for International Development.

Translated by permission from PICTORIAL  
PILGRIM'S PROGRESS by John Bunyan.  
Copyright 1960, Moody Press, Moody Bible  
Institute of Chicago.

A Storybook in  
Uniray Dumaget  
32.33-286-3.4C 54.150P-866016B  
ISBN 971-18-0027-6  
Printed in the Philippines  
DUPP01-05.LI

## Tungkul de Nagsolat de Oyo a Libro

I nagsolat ni oyo a libro ay i te ngalan a Huwen Bunyan, ta eya ay peabuya ni pesan.

Nakulong eya dehil de pagtodu na ni Surut nun Makedepat. Ta misan de kolongan eya ay geadel eya a tuloy de Surut nun Makedepat ta nagkatabengan i innawa na.

Nagkolungkut eya dehil de nakiblag eya de mittanak na misan ay nagkelibeng eya dehil de pagpanulusan na de Makedepat.

Nun duman eya de kolongan ay nagulu a masakut i esip na tungkul de pagpolong ni manga agta a magi manganak na de pagpanulusun.

Dehil buot na a tumibong i innawa de ay te belak eya a nagsolat dide. Nun te gepo eya a gesolat ay gepangnenop eya, ta kinta na de pangnenop i manga gepanulusun a getotul a paagow de kataanan ni Makedepat. Dingan tinumuloy eya a nagsolat hanggen natapus. Ta i sinolat na ay i Libro a oyo a te ngalan a **I PAGKANG NI GEPANULUSUN DE KATAANAN NI MAKEDEPAT.**



De pagulugela ko de disapow ni putok i ay  
nakadetong ok de isin a magi beloy ta duman  
ay napapede ok. Nano ay nangnenop ok ni  
magi oyo...



Te isin a agta a te ngalan a Nalagelag a  
napabedu ni nagsigisi a nomol ni libro pati  
te naadde a mabiyet de idog na ta winalat na  
i lugel na a sadile. Ta nun eya ay gebesa ni  
libro ay loktat a nagtangos pati gekinkin de  
takot na dehil de pagbesa na. Dingan inumolang  
a sinabi na, "Ano man i depat ko a yeyedi?"  
Yedi 16:30



Nano ay pagampulang na de beloy na ay an na buot a kekita ni mittanak na i pagkalungkut na. Misan ay namas pa ngani a nagulu ta sinabi na de mittanak na i pesan a nadeinnawa na a, "Nano katinggesan yu mittanak ko a te adde ok ni mabiyet ta angko kaya. Ako ay talage a nagkatakut a masakut ta i lugel kon a oyo a kataanan tam ay sasonug ni apoy gepo de langot. Ta ikitam ay talage a nelibun be ang kitam nototul dio."



Misan i mittanak na ay nagtaka a  
nagkatakut ta pesabi de a nasede i esip na ta  
an de pinanulusonan i sinabi na. Kanya  
pedodul de eya a mapede ta peesip de a  
nepiyon i esip na be napede.



Misan ay am pala eya napede ta magdemag ay  
getangos pati geinnawa ni madisaladin dehil  
de takot na,





Nano ay nun abiabi nun nagbiseta i  
mittanak na diya ay namas pan di a malot i  
kabetyag na. Kanya pinagsabian na i mangáyun  
na a liwet tungkul de pagsunug ni lugel de.



Kanya la ay peilokan de pati pesosol de eya  
pati magkabuyu ay an de pesapot a an de  
pepanulusanan.



Dingan nagtiis eya pati nagkolungkut de  
yinadi diya ni mangayun na ta nana ay  
inumampulang eya de kuwarto na a te lungkut a  
sinabi na a, "Bekot ta magi oyo ok" Dingan  
napalangin eya de Makedepat a kalbian na tebe  
i mittanak na.



Kanya adow adow ay getotul eya de kapadengan a gebesa ni libro na. Misan ay magkabuyo ay gepanalangin be magkabuyo pan ay gebesa ta de pagbesa na ay talage ngani ay nagkatakut eya ta nagkapaolang ni magioyo a, "Ano man i yeyedi ko tangani maligtas ok" Dingan eya gesulusalepat a kasta buot na a negikan. Misan ay an na pan katinggesan i paagowen na.



Nāno ay kinta ko a natagbu na i isin a lalaki a i ngalan na ay i Magtutodu. Ta tinanto eya ni Magtutodu a, "Ano man ta getangos kamo" Misan ay tinumubég un getangos a, "Ay ayun nabesa ko man de libro a nelibun pati hahatolan ok misan ay anok pa napahande. Angko pa buot a nelibun ta nagkatakut ok a hahatolan. "Tinumubeg i Magtutodu a," Bekot ta am mo buot a nelibun ay malot pan i edup dio ta makmuk ngani i kamalotan dio." Dingan tinumubeg un migtangos a, "Ta dehil de adde ko a oyo ay be nelibun ok ay talage a madisalaad pa de taporan ta dingan napa de podusahan ok."



Dingan tinato eya nun Magtutodu a, "Be maginon i esip mo bekot ta ammo pelawag i natabeng dikaw." Tinumubeg un migtangos, "Dio ok ta ang ko katinggesan i paagowen ko." Ay dingan biniyen eya ni Magtutodu ni papel a te solat ta nagbesa eya a magioyo a, "Umelag kamo de gengsa ni Makedepat a nadetong." Ay dingan pagkabesa na ni oyo ay pinagelawag na i Magtutodu ta tinanto na a, "Dene ok man paagow."



Nano ay tinodu ni Magtutodu i malawa a kapadengan ta dingan tinanto na i Nalagelag a, "Pekita yu man i megot a inon a pintohan de pagotan ni kalasan dena de alayu?" Misan ay an pekita a piyon ni nalagelag i pintohan misan ay nagkatallangan ni gepakaingap. Ta dingan sinabi ni Magtutodu a, "Umabut kamo de tallang a inon, wet kamo nekiblag ta kekita yu i pintohan dingan tumuktuk kamo ta dingan sasabi dikamo duman i depat yu a yeyedi."



Ta kinta ko de pangnenop a tinumalinga i lalaki a oyo de sinabi diya ni Magtutodu ta ginumikan eya a paagow de megot a pintohan. Ta kinta ko pala a peolangan eya ni mittanak na tangan umampulang. Misan tinaklopan na i talinga na a geolang a gegikan a an eya gelingoy de lugel na ta i peolang na ay, "Edup a an te kalog."





Misan ay pinagilokan eya ni kamakmukan a kabeloy na ta un kakmukan pan ay buot de eya a tatakut ta i kakmukan pa ay buot de a umuli eya.

Nano ay un aduwa dide ay i ngalan de ay Maksa a Innawa pati Malumoy a Innawa. Ta i oyo-ngani ide ay te belak a paampulang de a mapelit i Nalagelag, Misan nano ay andi Nalagelag i ngalan na ta Gepanulusun.



Dingan ginumikan ide a geabut de Gepunulusun.



Misan ay tinanto na ide a, "Bekot ta peabut ok yu." Magi oyo i tubeg de a, "Peabut mi ikamo tangani aakit mi ikamo a nouli." Misan ay sinabi na dide a, "An napatud ta i lugel a inon a pinanganakan deko ay nosunug dingani. Ta be nalibun kitam duman ay i kataporan tam ay apoy dila. Kanya ikamo a pipiyonin ko a mangáyun ay sumut kamo deko". Misan ay tinumubeg i Maksa a, "Ay buot yu man a sasabi ay walatin mi i mangayun pati keedup mi ide?" Nano ay tinumubeg un Gepanulusun a, "Oo, maginon ngani i buot ko a sasabi ta i kapiyonan a inon ay an te kapadepade ni kasampatan a dedetongan tam be nosut kamo deko mangáyun a nekipagtiis deko a wet naampulang."



Tinumubeg i Maksa, "Be wawalat mo man i edup de putok i ay ano i lalawag mo. Deno mo nun kekita?" Nano ay tinumubeg i Gepanulusun a, "Talage a i pelawag ko ay i mana ko a an te pagkasede a an nagkoubus. Ta i oyo ay hinande duman de langot ta peboy la yo a an te beyed be dinumatong i panahon nunde pesan a gelawag ni oyo a masakut." Sinabi na a tuloy a, "Inon ay pekita tam be nabesa tam de libro ko i." Sinabi ni Maksa a, "Sukul di non ta depat a kalipatan yu di i libro yu na. Nano ay nosut kamo dikami o eyen?" Misan ay sinabi ni Gepanulusun a, "Anok di yo naampulang ta te gepo ok a nototul."



Kanya sinabi ni Maksa de Malumoy a, "Ay tamdi, umampulang ta walatin tam i kasta lolong a oyo a geesip a te katinggesan pa de pesan." Misan ay sinabi ni Malumoy de Maksa a, "Wet mo eya pagilokan ta eya ay piyon a agta ta be matud ngani i pesabi ni libro na ay ay namas pa a piyon i kapuoyin na." Ta sinabi na a tuloy a, "Kasta buot ko a nosut diya." Dingan sinabi ni Maksa de Malumoy a, "Ay be maginon ay nekilolong ka pala a nosut diya. Hale di, umampulang kitam di ta an tam katinggesan i paagowen ni oyo a lolong."



Sinabi ni Gepanulusun de Maksa a, "Wet mo pepelit a umampung i ayun mo na ta kamatoden i pesabi ko tungkul de lugel a te kasalegen. Nano be ang kamog gepanulusun de pesabi ko ay besain yu i libro a oyo ta i pesabi ni libro a oyo ay kamatoden ta i nagsolat ni oyo ay binumusbus i sagu na a pantubus. Ta i sagu a inon ay katibeyen a i libro a oyo ay matud." Dingan sinabi ni Malumoy de Maksa a, "Buot ko a nosut de oyo a piyon a agta a nekipagtiis de kahedepan." Dingan tinanto na i Gepanulusun "Katinggesan yu man i bektas?" Tinumubeg i Gepanulusun, Ay-o ta aabut ko pan i tinodu ni Magtutodu de megot a pintohan ta pagdetong tam duman ay te gepaliwanag dikitam ni yeyedi tam duman." Dingan sinabi ni Malumoy a, "Piyon nun. Toldi."



Nano ay sinabi ni Maksa a, "Ay anok nosut de agta a nasede i esip na kanya naampunglang ok di a nouli."

Misan ay tuloy i pangnenop ko ta kinta ko i Malumoy pati Gepanulusun a nasurutsurotan a getotul. Ta sinabi ni Gepanulusun a, "Ay nagkasalig ok ta nanulusun ka deko a sinumut. Nano ay be natinggesan tebe ni Maksa i malot a nasapit de benwaan a inon ay andi ngan eya inumampunglang duman." Ta sinabi ni Malumoy de Gepanulusun a, "Kabinsa, paliwanagin yu pan tebe deko i tungkul de paagowen tam ti magi ano i kasalegen duman" Misan ay tinumubeg i Gepanulusun a, "Talage a katinggesan ko de innawa ko misan ay ang ko katinggesan a sasabi de surut. Misan be buot mo a geadel tungkul de iwina ay bebesa ko de libro ko i tangani matinggesan mo."



Nano ay tinanto ni Malumoy de Gepanulusun a, "Ano i esip yu, matud man i pesabi ni libro yu a iwina?" "Matud ngani a masakut i pesabi ni libro ko a oyo ta i nagsolat ni oyo ay an napatud a gebutil." Nagtanto a liwet i Malumoy a, "Ano man nun ide?" Ta magi oyo i paliwanag ni Gepanulusun a, "Te isin a Hari a an te kalog ta eya i namoy ni edup a an te kalog tangani kakoloy na ikitam de sasakopan a inon a an te kalog." Nagtanto a liwet i Malumoy, "Ulu ano pa." Tuloy eya a gepaliwanag a, "Ta de nasasakopan a inon ay ikitam ay gesuklong a an te kapadepade pati manga bedu a gepakaingap a magi adow." Pagkaikna ni Malumoy ninon ay sinabi na a, "Talage a piyon nun. Ano pa." Tuloy i Gepanulusun, "Ta duman ay andi te natangos o nolungkut ta popunasan na i luwa tam a eya a te adi ni nasasakopan a inon." Tinanto ni Malumoy, "Ino man i kakoloy tam duman?" Dingan tinubeg ni Gepanulusun a, "Ay i manga anghel ide a te gepakaingap pati makmuk a masakut a naona di gepo dio. I pesan duman ay te malenis a innawa a an te kasalanan pati te pagbuotan a masakut pa."





"I makmuk a naona dikitam duman ay i manga nagtiis ni makmuk a kahedepan dio de putok dahil de pagpanulusun de de Makedepat a magi oyo ide, binigeden pesunug naumos pati inongut de matapangin a hayup ide. Misan ay nano ay getaan ide de Makedepat magpakapide pa man." Dingan sinabi ni Malumoy, "Ay masampat i pesan a sinabi yu misan ay papalano kitam pan a nadetong de inon a kasampatan tangani napa dikitam pala a pesan a inon?" Dingan sinabi ni Gepanulusun a, "Talage a sinabi ni nagsolat ni libro a i Panginoon tam a boboy na a an te beyed i misan ano a aaged tam diya." Dingan sinabi ni Malumoy a, "Talage a nagkasalig ok a gepatalikngoy tungkul de pesan a oyo misan ay toldi." Inon i pag-aket ni Malumoy. Misan ay sinabi ni Gepanulusun a, "Anok ngani nakototul ni maparipari a magi buot ko dahil de naadde ko i."



Misan ay kinta ko de pangnenop a dinumatong ide de lugel a makilotit ta i oyo ay de gitna di ni kapatagen. I ngalan ni kalutetan a oyo ay Talbok a Gepahena ni Innawa.

Ta dehil ngani de an ide geengat ay linumunud ide de makilotit. Misan ay dehil ngani de buot de a nakabbut ay madiplut ide a masakut ta i Gepanulusun ay dehil de te adde eya ay kasta nagkelinod dingani.

Sinabi ni Malumoy a, "Bekot ta an tam yo kinta a napatuloy kitam dio." "Mainde, ang ko katinggesan pati ang ko pala katinggesan i yeyedi tam."

Nano ay i Malumoy pan ay nagbulas a sinabi na a, "I oyo mangani i kasampatan a pesabi mo deko. Nano be magioyo kahedep i tagibu pa i ay ano pan i nasapit be natapos i pagtotul tam?"



Kanya sinabi ni Malumoy a, "Be ako ay nakalayu dio a te edup pa ay ikamo dila i notuloy ta nouli ok."

Pagkasabi na ninon ay pinelit na a nakalayu de kalutetan a inumampulang di. Dingan eya ay tinumotul a tambing ta andi eya kinta ni Gepanulusun kapide man.



Misan ay nagtiis i Gepanulusun a gesabusabu de kalutetan hanggen eya ay nakadetong de dipa, ta i oyo ay paagow di de megot a pintohan. Misan ay an dingan gepakabbut eya de lutit dehil de gebiyet i adde na kanya nagkalinod di.

Nano ay kinta ko de pangnenop a linanean eya ni isin a lalaki a te ngalan a Migtabeng.



Ta buot na a katinggesan ti ano i peyedi duman ni Gepanulusun. Kanya sinabi ni Gepanulusun a, "Sinabi man deko ni agta a te ngalan a Magtutodu a abutin ko kon la i bektas a oyo hanggen de iwina a pintohan tangani maligtas ok de malot a padusa a nadetong. Misan ay nun yinadi ko i sinabi na ay nadegdeg ok dio." Nano ay tinanto eya ni Migtabeng a, "Bekot ta an yu kinta a an yu pa linawag i piyon a sesikaden?" "Dehil de buot ko a makadetong a tambing de iwina a pintohan ay tinipong ko i sinilan ko, kanya nadegdeg ok." Inon i tubeg ni Gepanulusun. Dingan sinabi ni Migtabeng a, "Umain mo i kumut mo." Ta binotong na a patanga.



Dingan tinanto ni Gepanulusun a, "Bekot ta i bektas a oyo a inumapo de Kahedepan a lugel a paagow de megot a pintohan ay an tinapuran i kalutetan a oyo tangani an nadegdeg i belang nesila dio?" Misan ay tinumubeg i Migtabeng a, "Ay napatud nun misan ay mahedep a yeyedi ta i kasalanan ni belang gesila dio i kasta getipun ni i oyo a kalutetan kanya ngan yo te ngalan ni Gepahena ni Innawa. Misan ay an buot ni Hari a kaditasan a dio i kalutetan a oyo ta sinabukan di ni manga agta a pakepiya i lugel a oyo a te duman ni isin a lebu siyam a dian a taon misan ay an napatud."



Sinabi na a tuloy a, "Ta talage a pinapuoyen di ni Hari a kaditasan ni pesikaden. Misan be getapok ay gelinod pan i sekaden de lutit ta i kamakmukan ngani a gesila dena ay nagkelinog kanya pan nagkadegdeg ide de lutit. Misan ay nakadetong pan ide de megot a pintohan ay napa ni piyon di i bektas."



Nano ay kinta ko de pangnenop a i Malumoy ay dinumatong di de beloy na ta tinagbu eya ni makmuk a mangáyun na. Ay sinabi ni tipide, "Ay piyon i esip yu ta inumampulang kamo." Misan ay sinabi ni kakmukan a, "Kasta lolong ka a sinumut de Gepanulusun." Ta linibek pan eya ni kakmukan ta sinabi de a bekot ta migkatakut eya ta te gepo di ay inumampulang pan nun te kahedepan a untik. Ta i Malumoy pan ay an dila geyamyam dehil de amamos na. Misan ay angan naloy ay matapang eya a nagsurut ni paglibek tungkul de Gepanulusun.





Nun i Gepanulusun ay lalan dila a getotul ay natagbu na i isin a agta a nag-adel a masakut ni pesan dio de putok i a te ngalan a Makikakatinggesan. Ta getaan eya de benwaan a te ngalan a Pigadelan. I oyo a benwaan ay hanga a masakut a alane de benwaan ni Gepanulusun.



Nano ay kinta ni Makikakatinggesan i Gepanulusun a geinnawa ni madisaladin dehil de adde na a mabbiyet. Ay dingan tinanto eya ni Makikakatinggesan a, "Deno ka man paagow a te adde ni wina a mabbiyet. Bekot ta adde mo nay?" Ay tinumubeg eya a, "Ay matud ngan yo a mabbiyet pati kasta misan deno de putok ay an te agta a te adde ni magi oyo a kabiyet. Paagow ok de megot a pintohan a inon ta te nagsabi deko a te napataan duman a gesabi deko ti papalano a nabut i nadde idog ko i a mabbiyet." Nano ay tinanto eya ni Makikakatinggesan a, "Ang ka man te bebi pati manganak?" Tinumubeg i Gepanulusun a, "Aysa. Te bebi ok pati manganak misan ay anok pala te kasalegen dehil de adde ko a oyo misan dena i mittanak ko."



Kanya sinabi diya ni Makikakatinggesan a, "Ano. Natalinga kaman be kakatnigen ko ikaw?" Ay dingan sinabi ni Gepanulusun a, "Ano man ta anok nonulusun be piyon i sasabi mo ta namas a kaelangan ko i tabeng." Sinabi ni Makikakatinggesan a, "Totoduan ko ikaw tangani mabut a tambing i adde mo na ta talage a ang ka gekaduman ni tibong ni esip hanggen ammo peyedi inon. Pati ang ka pala gekaduman ni kasalegen a inumapo de Makedepat." Dingan sinabi ni Gepanulusun a, "Iwina ngani i pelawag ko misan ay ang ko pan yo nagkabobut a lalan pati am pan te agta de lugel ko a nakapambobut ni oyo. Kanya ngan nano ay kinumang ok de bektas a oyo tanganbi mabut ko i adde ko a oyo." Ay dingan sinabi ni Makikakatinggesan a, "Ino man i nagsabi dikaw a be dio ka nesila de bektas a oyo ay nabut i adde mo na?" "Ay isin man a agta a te ngalan a Magtutodu." Inon i tubeg na. Ay sinabi ni Makikakatinggesan a, "Bekot pan ta an na ikaw biniyen ni piyon a pagtodu. Ta nano ngani ay pekita mo ngani a i bektas a oyo ay te panganib ta mahedeppan yo de pesan a bektas dio de putok i."



Sinabi na a tuloy a, "Talage a kasta ni sinumila ka di de kahedepan ta pekita ko pan de makmuk a belaho a te ngalan a Gepahena Ni Innawa i lawes mo. Nano ay katlinggesan mo i kahedepan a oyo. Patalikngan ok mo ta ako ay matande pa dikaw. Bekot ta getuloy ka pa ta i kahedepan pan a iwina ay gepo la ni kahedepan a sesilan mo ta dena ay gekaduman ka ni pagel, orom, tigeng, ohow pati matapangin a hayup de bukod a te tigbis ka pa pati panganib de abi pati kalebunan mo." Sinabi a tuloy ni Makikakatinggesan a, "Bekot ta ang ka naguluesip ta nanulusun ka de sinabi ni agta a am mo peabuyenan a am mo kinanugunan i edup mo."



Tinanto eya a liwet ni Makikakatinggesan a, "Papalano man a nagkaduman ka ni naadde?" "Natinggesan ko la yo dehil de pagbesa ko de libro ko a oyo." Inon i tubeg ni Gepanulusun. Nano ay nagsurut a liwet i Makikakatinggesan a magi oyo, "Talage ngani ay iwina a mabbiyet ay dehil de pagbesa mo de iwina a libro ta nassolat dena a tungkul de malot a adde ni agta. Talage be gepanulusun ka de iwina ay te mabbiyet ngani. Kanya puoyin mo iwina a libro a manulusun ka deko tangani piyon i edup mo dio de putok i dingan kelipatan mo i mabbiyet a an ka te kahedepan. Tinumubeg i Gepanulusun a, "I talage la a pagkatakutan ko ay i adde ko i ta anak masakut a nagkatakut de pesan mo a sinabi a panganib. Talage ngani a misan mapasila ok de kahedepan ay be i oyo i nakapambobut ni adde ko ay anak gekapoy." "Bekot ta dio mo pelawag a nabbut de bektas a oyo a te panganib? Nano be natalinga ka la deko ay naamit mo i buot mo ni andi te panganib ta gekaduman ka ngani ni kaligtasan ta napa dikaw pa i kasalegen pati kasamaptan a innawa." Inon i sinabi ni Makikakatinggesan.



Dingan sinabi ni Gepanulusun a, "Be magi nun i katinggesan mo ay tabengan ok mo a maglawag ni oyo." Tinumubeg i Makikakatinggesan a, "Talage ay piyon i esip mo nano ta dehil ngani de pagtalinga mo deko ay talage a napa ni piyon i edup mo. Nano ay te lugel dena a te ngalan a Piyon A Ugeli ay te isin pan a agta duman a te ngalan a Geabut De Pagdodul." Inon i sinabi ni Makikakatinggesan. Sinabi na a tuloy, "Ta eya ay te katinggesan ta makmuk a agta i nagpamatud a tungkul de piyon a ugeli na. I eya ngani i te katinggesan de manga agta a te manga adde ni mabbiyet ta makmuk dingani i tinabengan na a magi ikaw. Pati te kaya eya a gepakapiya ni esip ni magi ikaw nano. Ta angan masakut a alayu i beloy na dio kanya kumang ka duman ta pabut mo i adde mo na." Sinabi na a tuloy a, "Ta yadi pa a wet ka umampulang de beloy yu ta pakangan mo la i mittanak mo ta duman ay makmuk i beloy a an te napataan ta i opa pan pati papangan ay mora la. Talage a namas pangani a nasalig ta makmuk i kabeloy mo ta pati i manga agta duman ay naponulusonan ta piyon i edup mo duman a an te gulo."



Ay talage a an katinggesan ni Gepanulusun i yeyedi na nano misan ay peesip na a be matud la i sinabi ni agta a oyo ay depat ngani a talingaan na. Kanya talage a tiniblug na i innawa na a nakang di eya de beloy ni te ngalan a Geabut De Dodul. Dingan sinabi na a, "Toduin yu deko i beloy na." Ay dingan sinabi ni Makikakatinggesan a, "Pekita mo man iwina a bungku. Ta de bilew ni wina i tagibu a beloy ay beloy na di ta i bektas ay depat a nelebut de bungko na o." Nano ay tinumotul i Gepanulusun de oyo a bektas tangani gepatabeng de mabbiyet de idog na a napakiblag de an malawa a bektas a depat a paagowen na.



Misan ay nun duman di eya de alane ni bungko ay natakut eya a notuloy ta kasta maditas i bungko. Isin pa de inoman ay kasta kaddegdegin i ulo na ni katangatanga a beto de kadepit ni ulo na ta i adde na ay kasta namas pan di a gebiyet. Pati pekita na a gesapwar i apoy a geapo de bungko kanya natakut eya a kati masunug. Ay talage a natakut i Gepanulusun a peulualdut a gekinkin.





Nano ay gesosol eya a masakut ta bekot ta nanulusun de todū ni Makikakatinggesan. Ay dingan kinta na i Magtutodu ta nano ay talage a nagkamamos eya diya.

Tinanto eya ni Magtutodu a magioyo, "Ano man i peyedi mo dio?" Misan ay angani nakatubeg i Gepanulusun ni misan ano.



Dingan sinabi ni Magtutodu a, "Am man la ikaw un lalaki a inumapo de lugel a Kahedepan a nagtangos." Tinumubeg i Gepanulusun a, "Aysa ako ngani." Dingan sinabi a tuloy diya ni Magtutodu a, "Am mangan un tinodu ko di dikaw i bektas a paagow de megot a pintohan. Ay bekot ta mandeli ka a nalagelag. Ta nano ay alayu ka di de bektas a depat a sesilan mo." Misan ay nagpaliwanag i Gepanulusun a, "Pagkasila ko nunde kalutetan ay natagbu ko i isin a lalaki a nagsabi deko a dio ko kekita i nakapambobut ni adde ko i. Misan ay pagdetong ko ngani de lugel a oyo ay natakut ok de kinta ko ide i kanya ang ko katinggesan i yeyedi ko."



Nano ay sinabi ni Magtutodu a, "Ano i sinabi na dikaw?" Ay tinumubeg i Gepanulusun a magi oyo, "Tinanto na ti deno ok paagow kanya sinabi ko diya." "Ano pa?" tanto a tuloy ni Magtutodu. Ta sinabi pa ni Gepanulusun a, "Tinanto ok na man be te bebi ok pati mangának. Ay sinabi ko oo misan ay sinabi ko diya a tuloy a anok pan te kasalegen misan duman ok dide ta dehil de nadde idog ko a mabbiyet." Sinabi ni Magtutodu, "Ano pa i sinabi na dikaw?" Tinumubeg i Gepanulusun a magi oyo, "Yadi pa a bobut ko di a maparipari iwina a mabbiyet. Kanya sinabi ko diya a kanya ok ngan paagow de megot a pintohan ay tangani mabut yo a nadde idog ko. Ta sinabi na deko a, Nano ay totoduan ko ikaw ni mamiyen pa a paagowen tangani nabut a tambing i adde mo a mabbiyet de alane la a lugel ta i tinodu dikaw ni Magtutodu ay angan piyon." Sinabi a tuloy ni Gepanulusun a, "Kanya pan tinumalinga ok diya a kinumiblag de paagowen ko. Talage a buot ko a mabut di i adde ko i misan ay pagdetong ko dio a kinta ko i lugel a oyo ay nagkatakut ok a masakut ta anok nakotuloy ta nano ay ang ko katinggesan i yeyedi ko."



Dingan sinabi ni Magtutodu a, "Kanin pa, ta patalikngan yu ta nano ay petingges ko dikaw i surut ni Makedepat." Ta nagbesa ngani un Magtutodu ta i Gepanulusun pan ay gekinkin a napauddi ta i binasa ni Magtutodu ay, "Wet kamo gekapoy de Makedepat a gesurut dikamo ta nun nowon ay pinadusahan ngani i gekapoy ide de Surut nun Makedepat de kalasan a Sinai. Kanya namas kitam pa a podusahan be gekapoy kitam de Surut nun Makedepat a geapo de langot." Hebreo 12:25 Binasa na a tuloy, "I gepanulusun la i nappa ni malenis a an te kasalanan de pekita ko ta eya i te edup a bowon a geapo deko, misan be i misan ino ay getalikokod deko ay kagengsaan ko eya." Hebreo 10:38 Sinabi a tuloy ni Magtutodu, "Talage a nalane ka de kalebunan ta kinapoyen mo i surut ni Makedepat dingan kinumiblag ka pa de bektas a te kapiyonan."



Ay dingan nun inikna ni Gepanulusun i surut nun Makedepat ay napaubbub a getangos ta sinabi na a, "Ay malot ok a depat a podusahan." Misan ay nun kinta ni Magtutodu ay binolan na de kumut na a pinagiyus na ta sinabi na a, "Nappatud a pakeeyenan i manga agta ni misan ano a mammalotin." Mateo 12:31. Ta nagbesa eya a tuloy a, "Wet geuluaduwa i esip mo ta manulusun ka di." Huwen 20:27. Dingan sinabi a tuloy ni Magtutodu a, "Patalikngan mo yo a piyon. I agta a nandeya dikaw ay te ngalan a Makikakatinggesan. Matud ngani i ngalan na ta makikakatinggesan eya de ugeli dio de putok i. Ta buot na i pagtodu a oyo ta peeyenan na ni kabuluhan i padipa ni Kristo a inapoan ni kaligtasan."



Dingan sinabi a tuloy ni Magtutodu a, "Ta de tinodu na dikaw ay tiluwon a depat mo a kagengsaan ta umelag ka. I tagibu ay linagelag na ikaw de matud a bektas. Kaduwa ay pinelit na a kapuoyen mo i tungkul de padipa ni Hisus. I katiluwon pan ay dinodul na ikaw de kalebunan."



Ay dingan nagtangos a masakut i  
Gepanulusun ta nagkamamos eya. Dingan sinabi  
na a, "Malot i esip ko ta tinumalinga ok de  
surut ni Makikakatinggesan kanya nano ay  
kiniblagen ko i matud a bektas."



Dingan tinodu ni Magtutodu de Gepanulusun i  
depat na a yeyedi tangani naampulang de matud  
a bektas ta pinagsabian na a mahigpit a  
mag-engat tangani wet nadedeya a liwet.






Ta nano ay sinabi ni Gepanulusun a, "Nano ay naampulang ok di de matud a bektas" Ay dingan sinabi ni Magtutodu a, "Napa dikaw tebe i kosa a tabeng ni Makedepat ta umelag kamo a wet nadedeya a liwet."



Ay dingan tinumotul a tambing i  
Gepanulusun a paagow de pintohan. Misan an  
eya te pinakisurutan misan ino de bektas  
hanggen nakadetong eya de matud a bektas.



Nano ay makadetong eya de megot a pintohan -  
ay kinta na i solat a nasolat de kadepit a  
ditas ni pintohan a magioyo, "Tumuktuk kamo a  
tuloy ta kakayasan i abetan para dikamo"  
Mateo 7:7 Kanya maginon ngani i yinadi na ta  
nagtuktuk eya.



Angan naloy ay te nagkayes ni pintohan ta i oyo ay te ngalan a Te Piyon a Innawa. Ta tinanto na eya a ti ino eya, deno eya inumapo pati ano i kaelangan na. Tinumubeg i Gepanulusun, "Ako ay agta a makikkakasalanan a nagkebiyetan a masakut, ta inumapo ok de lugel a te kahedepan ta nano ay buot ko a nakang de Kalasan a Sion tangani maligtas ok de padusa a nadetong."



Misan ay nesilong di i Gepanulusun ay te duman a loktat a nambotong diya. Dingan eya ay nagtanto a "Ano man i buot a sasabi ni oyo?" Ay sinabi diya ni Te Piyon a Innawa a, "Amman alayu dio i hanga a beloy ni Satanas ta pebentayin na a papana i misan ino a gekang de pintohan a oyo ta an na buot a te edup pa i nesilong dio ta i uluisin ay nagkelibun a eyen gepakasilong."



Nun eya ay duman di de disalad ay sinabi  
ni Gepanulusan a, "Ay nagkasalig ok ta ako ay  
dio di."

Dingan tinanto eya ni Te Piyon a Innawa tungkul  
de pagtotul na ta sinabi na pan i pesan a  
nangyedi.



Pagkasabi ni Gepanulusun ninon ay sinabi ni Te Piyon a Innawa a, "Nano ay sumut ka deko ta totodu ko dikaw i bektas a depat a sesilan mo. Nano ay pekita mo man i matanus a iwina a bektas a nadde kasagkaden mo. Sigudu pekita mo a matanus nay a masakut. Ta iwina ngani i depat a sesilan mo. Ta i nagyedi pan ni oyo a bektas a matanus ay i Magsasabi ide a den nun Makedepat i Kristo pati Mag-aadel na ide. Misan ay tinanto diya ni Gepanulusun a magioyo, "Am mangan nay te sanga a kalagelagen ni magi ako a bowon dio?" Tinubeg eya ni Te Piyon a Innawa a, "Makmuk i sanga ni oyo misan ay aabuyenan mo pan ta malawain pati kiwongin i oyo ngani i an matud a bektas. Misan ay i an malawa pati matanus a bektas ay i oyo ngani i matud a bektas. Ta be aabut mo i bektas a oyo ay nadetong ka de beloy ni Magpapaliwanag ta eya ngani i getodu dikaw ni piyon pa a pagtodu."



Nano ay tinumuloy i Gepanulusun de paagowen na hanggen nadetong na ngani i beloy ni Magpapaliwanag ta tinumuktuk eya ni tipide. Ay dingan kinayesan ngani un pintohan ta nagtanto un nagkayes, "Ano man i ngalan mo?" Ta tinubeg i Gepanulusun a, "I ngalan ko ay Gepanulusun. Napatud man a nakasurut ko i te adi ni beloy a oyo?" Ta nun dinumatong un te adi nun beloy ay sinabi ni Gepanulusun a, Pinakang ok dio ni Te Piyon a Innawa."





Dingan sinabi ni Magpapaliwanag a;  
"Sumilong ka ta toto du ko i pesan a  
nakatatabeng dikaw" Dingan dinodul na de  
katabeng na a amitin na un salong ta inikag  
na i Gepanulusun de isin a kuwarto."



Nano ay dinumatong ide de isin a kuwarto ay kinta ni Gepanulusun i hanga a leterato ni agta a an nagkapeyom ta kasta geaket eya ni kaagtaan. Pati eya ay gepagelawag de longaw. Misan ay te nabolán un leterato a libro a pinakapiyon. Ta de ulo na pan ay te nasalukut a ginto ni hari ta tinalikokuden na i ugeli ni kaagtaan dio de putok i. Sinabi ni Magpapaliwanag, "I oyo a agta ay te kaya a gepakapiya ni ugeli ni kaagtaan pati te kaya eya tangani napa ni pinanganak a liwet i agta." Sinabi na a tuloy a, "Pekita mo man i ugeli ni agta ay de idogen na ta i salukut pan ni hari ay nasalukut na? Ta i kabuluhan niwina ay i manga agta a tinumalikokud de ugeli dio de putok i ta nano ay napa ni maditas ide de langut."



Nano ay inatid eya ni Magpapaliwanag de isin a hanga a kuwarto . Ta i oyo a kuwarto ay makidedelong ta ampa linenis kapide man. Dingan nangakit un Magpapaliwanag de isin a lalaki tangani magwelis. Misan nun gewilis di eya ay an ide pepakainnawa ni delpong. Ay dingan dinodul pan ni Magpapaliwanag i isin a mahuna tangani besain na tangani misan welisin ay an te delpong a naatimpog.



Ay dingan nagtanto i Gepanulusun a anoman i buot a sasabi ni oyo. Dingan sinabi ni Magpapaliwanag, "I oyo ngani a kuwarto ay kahalimbewa ni innawa ni agta, ta i sokal ide ay magi kasalanan na pati i pesan na a mammalotin a gepakapagpadiploot de pagkaagta na. Ta i kahalimbewa ni nagwelis a lalaki ay i pagdodul ide. Ta i mahuna a gebesa pan ay magi i piyon a bereta tungkul de Hisus. Ta tipapalano a an nagkelenis ni lalaki un sokal ay maginon pala i pagdodul ide ay pepakita na la i kasalanan ni agta misan ay an gepakapaglenis. Ti papalano a an gelipad i delpong ide dehil de orat ay maginon pala i Piyon a Bereta tungkul de Hisus ay te kapangyedihan a nambobut ni kasalanan. Ta i kaleduwa ni agta ay talage a pelenis ni Piyon a Bereta tangani napahande a tataanan ni Ispiritu nun Makedepat."



Kinta ko a liwet de pangnenop ko i Gepanulusun a inikag ni Magpapaliwanag de isin a untik a kuwarto a te aduwa a mangañk a kalipalipa. I ngalan nun isin ay Migtiyage ta un isin pan ay An Migtiyage. Ta i An Migtiyage ay eya ay te gengsa ta i Migtiyage ay an geyamyam.

Dingan tinanto ni Gepanulusun a, "Bekot ta an nagkasalig i An Migtiyage?" Tinumubeg i Magpapaliwanag a, "Sinabi ni kamoddenan na ay depat a geilat ni isin a taon tangani aamit na i kapiyonan na. Dehil de an na buot a geilat ay te gengsa eya misan ay i Migtiyage ay geilat eya."



Ta kinta ko ngani a te nangadde de An Migtiyage ni isin a soput a kayamanan ta talage ngani a nasalig eya pati pinag-ilokan na i Migtiyage dehil de buot na a geilat pa. Misan ay ampan naloy ay naubus di i kayamanan ni An Migtiyage ta dingan eya ay mahedep di.



Dingan sinabi ni magpapaliwanag a, "I An Migtiyage ay magi i kaagtaan dio de putok i a geesip la ni kabuotan de a sadile, ta i Migtiyage pan ay magi manga agta a geilat ni kapiyonan a nadetong. Nano ay i kamakmokaan a agta dio de putok i de nano a panahon ay an de buot a geilat ta buot de ay naamit de nano i kapiyonan. Ta ide ay magi An Migtiyage ta i buot de ay tambing de pala a ubusin i kayamanan de de an te kabuluhan.



Ay dingan kinta ko a kinabit ni  
Magpapaliwanag i Gepanulusun ta pinakita diya  
i gedilab a apoy a gedilab de alane de bekod  
a beto. Misan ay pepelit ngani a pepalong ni  
isin a agta de padean ni pamalis ni orat  
misan ay talage a genamas ngani a gedilab misan  
hanga di a orat i pepalis na.

Tinanto eya ni Gepanulusun, "Ano man i  
kabuluhan ni oyo?" ay tinumubeg i  
Magpapaliwanag a, "I kabuluhan ni apoy a oyo  
ay magi te gepo i kosa a tabeng ni Makedepat  
de innawa ni agta tangani mabowon i ugeli de.  
Misan ay i te buot a namalong ni wina a apoy  
a agta ay magi Satanas. Misan ay pagalawagin  
mo ta genamas ngani i dilab na ta to todo ko  
dikaw bekot ta maginon."





Kanya dila yo natinggesan ay nun sineling de de dibelew ni bekod ta kinta de duman i isin a agta a gepalis pala a tuloy ni langis nunde apoy tangani wet napalong. Dingan tinanto ni Gepanulusun, "Ano man i kabuluhan ni oyo?" Nano ay tinubeg eya ni Magpapaliwanag a, "I oyo a gepalis ni langis ay i Kristo de innawa ni pesan a pineta na a dehil de kalbi na an nagkapalong i pagbuot de diya ta tipapalano a an tam pekita i agta a gepalis ni langis be dio kitam de gepalis ni orat de apoy, ay magi nun pala i Panginoon a Hisus, ta dena eya getabeng be te kahedepan kitam misan an tam pekita. Kanya misan ano a pagtukso ni Satanas ay an ide nagkalayu de kosa a tabeng na."



Dingan inikag na i Gepanulusun de hanga a masampat a pintohan ta de ditow ni oyo a pintohan ay te apat a manga lalaki a matibongin a te manga bedu ni te pangsangge a magi sundelo. Ta de alane pala ni pintohan a oyo ay te gelipa de lamesa a te libro eya tangani sosolat na i belang te buot a nesilong pati de kasagkaden ni pintohan ay makmuk a buot a nesilong misan ay nagkatakut ide de matibongin ide. Ta de disapow ni bekod a beto ni hanga a beloy ay te kauluuddi a gesayed a te manga bedu ni malapsayin, ta pepakalawag de i kadepit ni pintohan.



Misan ay kasta angan te kaya un te buot ide a nesilong a gelaben de apat a oyo a matibongin. Ay dingan te isin a an nagkatakut a kinta i Gepanulusun a linumane de gelista ta inaged na a eya ay gepalista a nesilong a tuloy. Ay dingan nagsalukut ni pangsangge ta nangadde ngani ni utak tangani gelaben eya de apat a oyo. Kanya nakipagtigbesan eya a pasilong nunde pintohan hanggen nakadetong eya de disalad ta dehil de oyo ay nabigeden eya pati un kalaben na ide.



Pagdetong na de disalad ay makmuk i tinumagbu diya a nagkasalegin a gepinagkanta ni masampat a kanta. Ta binaduan de eya ni malapsay pala a bedu. Dingan napeyom ngani i Gepanulusun ta sinabi na, "Katinggesan ko i kabuluhan ni oyo kanya nototul ok di tebe."



Misan ay sinabi ni Magpapaliwanag a, "Kanin pa, ta te duman pa a pekita ok dikaw ay dingan tumotul ka di." Nano ay kinabit eya ni Magpapaliwanag ta inikag na de isin a kuwarto a madumos ta de oyo a kuwarto ay te gelipa a lalaki de bilanggoan a magi bekod. Ta talage a i oyo a lalaki ay gettunong dehil de malungkut ngani a masakut a geinnawa ni madisalad a nasede pa i innawa na. Nano ay nagtanto i Gepanulusun a, "Ano man i kabuluhan ni oyo?" Kanya sinabi ni Magpapaliwanag, "Tantoin yu eya ta sasabi na dikamo i dehilan."



Ta linumani ngani i Gepanulusun de malungkut ta sinabi na a, "Ino ka man?" Ay tinumubeg un malungkut diya a, "Talage a nagpanulusun ok de Surut nun Makedepat pati kapiyonan na pati inesip ko a ako ay paagow de langot misan ay nagkasala ok diya ta dehil de tinalingaan ko i sadile ko a kabuotan ay kasta pinalungkut ko i Ispiritu ni Makedepat ta winalat ok na ta binuot ko i Satanas. Kanya nano ay i Satanas i napadio deko ta nano ay pinakisa ko di i innawa ko kanya anak di napatud a gesosol." Ay dingan sinabi ni Gepanulusun diya, "Ang ka man di napatud a naampulang a gesosol de Makedepat?" Tinumubeg un Malungkut a, "Ay andi ta inabetan ok di ni Makedepat." Sinabi na a tuloy a, "Kalbian ok mo ta pinuoy ok dio ni Makedepat de oyo a kolongan a getiis ni padusa na magpakapide pa man."



Dingan sinabi ni Magpapaliwanag de Gepanulusun, "Wet mo kelipatan i inikna pati kinta mo a oyo tangani wet ka natolad diya." Kanya sinabi ni Gepanulusun, "Ay gepakatakut ngani i oyo kanya de tabeng ni Makedepat ay pemasden ko ngona i yeyedi ko." Ta nano ay sinabi na, "Laki, be napatud ay nototul ok di."



Misan ay sinabi ni Magpapaliwanag, "Kanin pa ta te pekita ok pa dikaw ta be natapus yo ay napatud ka di a nototul."

Dingan kinumang ide de isin pa a kuwarto a te agta ni bowon a napagiyus. Ta nun eya ay gebedu ay loktat eya a natakut a gekinkin. Sinabi ni Gepanulusun a, "Bekot ta gekinkin i oyo a agta?" Kanya sinabi ni Magpapaliwanag de gekinkin a, "Sabiin mo de Gepanulusun bekot ta gekinkin ka." Nano ay sinabi ni gekinkin a, "Dehil de pangnenop ko."





Sinabi na a tuloy a, "Ta de pangnenop ko ay kinta ko i langot a linumatom di a te kilat pati lagpak. Dingan kinta ko i isin a agta a gelipa de lepan ni hari de kunom ta napalebute diya i makmuk a masakut a manga anghel. Dingan inikna ko i malagdu a busis a gesabi a, 'Gumiyus kamo a ikamo a nalibunin ta sumagkad kamo de hukoman. Pagkasabi na ninon ay maginon ngani i nangyadi ta i pesan a nalibunin ay ginumiyus de taporan de. Te duman a nagkasalig, te duman a nagkatakut. Dingan sinabi ni gelipa de kunom de manga anghel ide a, 'I ante kapuluhan ay bobut de uluataben a apoy.'



Sinabi na a tuloy a, "Pagkaikna ko ninon ay i kauddian ko a putok ay pinumitak ni an te kalog a bulsut a getanga i dilab pati asok a masakut. Dingan inesip ko a dinumatong di i paghukom a pagkatakutan ko ta anak pa napahande." Inon i sinabi ni gepangnenop.



Kinatinggesan ni Gepanulusun i kabuluhan ni oyo. Dingan sinabi ni Magpapaliwanag diya a, "Tumotul ka di ta napa dikaw i kosa a tabeng ni Ispiritu ni Makedepat de paagowen yu de benwaan ni Hari de langot." Dingan tinumotul di i Gepanulusun a gekanta.

# SALVATION



Kinta ko de pangnenop a i Gepanulusun ay  
getuloy la a getotul de bektas a oyo a te bekod  
a magtimbang a te ngalan a Kaligtasan. Misan  
ginumikan i eya ay mahedep dehil de mabbiyet  
a adde na.



Ta eya ay geparipari la hanggen de nakadetong eya de pagotan a kauddian ni padipa. Ta de sidong nun pagotan ay te taporan a an te natapor.

Ay dingan kinta 'ko a pagdetong ni Gepanulusun de te padipa ay nabut i adde na ta i adde na a oyo ay nadegdeg ta binumulidbulid de sidong ni pagotan a nalusog a tuloy de taporan ta inon ay angko kinta kapide man.

Talage pan a nagkasalig i Gepanulusun dehil de nabut i adde na ta sinabi na a, "Te salig de innawa ko ta pinaimloyen ok ni Panginoon a Hisus gepo de pagtiis na ta nagkaduman ok ni edup a bowon dehil de pagkalibun na."



Misan ay nulunaloy eya a napauddi duman a getaka a masakut a nagkapatangos dehil de salig na ta an na peesip a be gelawag eya la de padipa ay nabbut a kosa i adde na.



Nano hanggen eya geuddi a nagkapatangos ay te linumane diya a tiluwon a agta a gepakaingap. Ta eya ay binate de, "Mapa dikamo tebe i kabeetan a esip ni Makedepat." Dingan sinabi nun isin diya a, "Ay pinatawad di i kasalanan mo." Un kaduwa pan ay inubeden na ni bedu na a nagisigisi ta binaduan na ni bowon a bedu a malapsay a masakut. Ta un katiluwon pan ay dinumuman na ni tande i Gepanulusun de ibu na pati biniyen na ni isin a lukot a kasulatan a te tande ta sinabi na diya a, "I oyo ay alagean mo hanggen getotul ka ta i oyo pala i pekita mo de bentay ni pintohan de langot be nakadetong ka duman."



Ay dingan tinumotul un tiluwon a agta a gepakaingap ta i Gepanulusun pan ay tinumuloy de paagowen na a gelugulawot ni salig na a gekanta ni magi oyo, "Ako ay gepasalamat de padipa maginon pala de taporan misan ay namas pa ngani de agta a napako dehil deko."





Misan ay kinta ko de pangnenop a de  
pagtotul ni Gepanulusun nun dinumatong eya de  
sidong ni kalasan ay kinta na i tiluwon a  
lalaki a napede de kaginglan ni rongtob a te manga  
tanikala de singit de. Ta i ngalan de ay i  
Mangmang, Tamad pati Gepanulusun Ok de Buot  
Ko.



Nun kinta ni Gepanulusun i tiluwon ay linanean na ide tangani bogbogin na ide ta sinabi na a, "Pemasden yu ta i lugel a peidean yu ay alane a masakut de kaginglan ni rongtob a an te kalog ta sigudu nadegeg kamo duman." Sinabi na a tuloy a, "Hale getabeng ok dikamo ta oukas ko i tanikala yu de singit yu." Misan ay tinumubeg ide a, "Ang kami pan te pekita a panganib." Dingan napede ide a tuloy. An te kaya i Gepanulusun a getabeng de aduwa ta tinumuloy eya de paagowen na. Misan peesip na de tiluwon a winalat na de maditas a rongtob a bekot ta an de pekita i panganib.



Nano ay nun geesip pa i Gepanulusun ay kinta na i aduwa a lalaki ta i ngalan de ay i Migbutil pati Migtalinga de Dodul, ta ide ay gedewet de bekod a beto.

Kanya tinanto ide ni Gepanulusun ti deno ide inumapo pati ti deno ide paagow. Ay tinumubeg ide a, "Ikami ay pinanganak de lugel a Kayabengan ta nakang kami de benwaan de langot ta lalawag mi i kayamanan duman.



Misan ay sinabi ni Gepanulusun, "Bekot ta ang kamo gesila de an malawa a pintohan a matud? Ta an yu man katinggesan a napaayun de pagdodul ni Hari de langot a i an gesila de matud a bektas ta de kakmukan gesila ay tulisan pati migpannakow."

Huwen 10:1. Tinumubeg ide a, "Para dikami ay alayu pa i pagkang de pintohan a inon. Kanya i pesan duman dikami ay dio gedewet a magi peyedi mi nano. Nakadetong ka dio a sinumila de an malawa a pintohan ta ikami a dinumawet de bekoḏ misan isin la i paagowen tam." Ay tinumubeg pan i Gepanulusun a, "Misan ay ako pan ay getotul ok a nappaayun de dodul ni Panginoon ko misan ikamo ay getotul dila de sadile yu a padean pati kabuotan. Kanya ikamo ay magi migpannakow de pekita ni Paninoon ni bektas."



Dingan sinabi nun aduwa a, "Behala kamo de  
pagyedi yu ta maginon kami pala." Kanya ide  
ay nagikinoloy a tinumotul a nasurutsurotan.



Dingan te gepo ide a gepakipagtalo de  
Gepanulusun ta sinabi de, "Misan pan ikami  
ay getalinga pala de pagdodul ide a magi  
ikamo ta de pekita mi ay padepade kitam la.  
Kanya kamo la bukud dikami ay dehil de bedu  
yu na o. Ta i bedu yu pan ay sigudu a binoy  
dikamo tangani nattaklopan i kauluamamos yu."



Kanya sinabi dide ni Gepanulusun a, "I oyo a bedu ay gepo de kosa a tabeng ni Panginoon a kakangan ko tangani aabuyenan ok de pagdetong ko duman ta pati te tande ok pan de ibu ko misan ay sigudu an yu yo pekita pati biniyen ok pala ni nalukut a kasulatan tangani nagkelibeng ok hanggen nadetong ok de pintohan ni langot a pepakita ko pala duman. Misan ikamo ay kasta ang kamo te magi oyo ide ta ang kamo sinumila de an malawa a pintohan." An ide nakatubeg ta nagsalepatan ide aduwa a geilok.



Ay dingan kinta ko a tinumuloy ide a pesan  
hanggen nakadetong ide de alane ni kalasan a  
te ngalan a Kahedepan ta de patag ni kalasan  
ay te bukal. Ta duman ay te tiluwon a  
nagkiblagen a bektas. Un isin ay paagow de  
awenan ta un isin pan ay paawili ta i oyo ay  
de sidong ni pagotan. Misan ay un matud a  
bektas a an malawa ay paagow pan de pagotan  
ni kalasan.





Ay dingan i Gepanulusun ay inuminum de magidnaw a orat ta i oyo ay bukal. Nano ay makainum eya ay kasta an di i pagel na ta te tabeng a masakut. Ta dingan eya ay te gepo di a gesakat de angras di a bektas.

Misan ay ide Migbutil pati Migtalinga de Dodul ay pagdetong de de alane nun kalasan ay kinta de a angras i bektas ay binuot de a nesila de kakmukan ide a bektas. Nano ay pineta nun isin ay isin a bektas a te ngalan a Panganib ta i oyo ay paagow de kabuko den na ay nalagelag eya duman. Ta i sinilan pan nun isin ay te ngalan a Kalebunan ta nadegdeg eya de rongtob a nalibun di.



Dingan kinta ko i Gepanulusun a gesakat de kalasan. Misan ay pilawag ko ti papalano eya a nasakat de pagotan ay angan naloy ay tinumimok eya de pagikan ta eya ay getotul dila. Misan ay talage a nahedepan eya a getotul ta te gepo eya a gedeyag ta angras pan a masakut.



Misan ay nun de gitna pan nun sakat ay te isin a lugel a pantay ta i oyo hinande ni Panginoon de kalasan tangani te pepaimloyen i nagkapagelin a getotul.

Nano ay pagdetong duman ni Gepanulusun ay naglipa ta tinanga na i kasulatan a nallukut ta eya ay nagbesa ni gepakalibeng a surut kanya ngani dehil de mahayahay ay napapede i Gepanulusun ni mahimbing ta nabilawen na i papel.

Ay dingan te linumane diya a nambogbog a sinabi na a, "Gumiyus ka ta pagalawagen mo i edup ni langgem a masepagin ikaw a nagkatamad tangani napani masepag ka."



Kanya tambing eya a tinumotul a pasakat nunde pagotan.

Dingan pagdetong na de pagotan ay nagtaka eya ta kinta na i aduwa a agta a patagbu diya. Ay tinanto ide ni Gepanulusun, "Manga ayun bekot ta naampulang kamo ta i oyo dingani un matud a bektas." I isin dide a te ngalan a Migkatakut ay tinumubeg a, "Paagow kami de benwaan de langot misan ay hanggen nagkalayu kami ay gemakmuk i panganib a nagkasilan mi kanya inesip mi a naampulang di," Ta sinabi na a tuloy a, "Ta de paagowen mi pan ay te aduwa a liyon a matapangin ta katinggesan mi a be nalane kami dide ay papangan de ikami." Ay dingan sinabi ni Gepanulusun a, "Ay talage ay petakut ok mo misan ay deno ok ngan paagow tangani maligtas ok ta be inumampulang ok de benwaan ko ay nelibun ok ngani. Misana ay te takut ok ni untik de pagkalibun ay talage ay be nadetong ok de iwina a benwaan de langot ay te edup a an te kalog kanya notuloy ok ngani."



Misan ay i te ngalan a Mahena a Innawa pati Migkatakut ay ginumikan a padolug de pagotan ta i Gepanulusun ay tinumuloy la de paagowen na. Misan ay peesip na un sinabi ni lalaki kanya buot na a gebesa ni kasulatan a nalllukut tangani nagkelibeng i innawa na. Misan ay an nad kinta. Dingan nagkatakut eya ta sinabi na a, "Sigudu ay nawalat ko de kinapedean ko." Dingan linumuhud a nanalangin a nagsosol de Makedepat ta inumampulang ta lalawag na un kasulatan a nalllukut.



Misan ay de pagampulang na ay getangos  
pati malungkut a masakut dehil de yinadi na ta  
sinabi na a, "I dehilan ni Panginoon de  
bektas a oyo nun yinadi na un paimloyen ay  
tangani gepaimloy i agta misan ako ay kasta  
anok te esip ta napede ok la duman talage a  
hanga i kasalanan ko."



Nano ay pagdetong na nunde kalinongan a  
pinagpaimloyen na ay linumipa eya ta  
nagtangos ta pagduko na ngani ay kinta na.  
Kanya tambing na a pinulut a te salig a  
masakut ta kasta i oyo a solat ay magi  
katibeyen na de langot pati dehil de pagbesa  
na duman ay katinggesan na a te edup a an te  
kalog.



Nano ay an nahedepan a gesakat i Gepanulusun. Misan ay dingan eya nakadetong de pagotan ay nelinod di i adow. Nano ay gesosol eya a liwet dehil de napede eya ta dehil de inon a kinabian eya pati nun naesip na i hanga a pagkatakut nide Mahena a Innawa pati Migkatakut de manga liyon ay sinabi na de sadile na a, "Be pekita ok ni manga liyon de madumos ay papangan ok de."

Nano ay nun gesosol pa eya ay napatingala eya ta kinta na i hanga a masampat a masakut a beloy a te ngalan a Masampat.





Ta kinta ko de pangnenop a kinangan yo a  
maparipari ni Nagalelag ta inesip na a  
duman di eya nepilong.

Misan ay nun alane di nunde beloy ay  
kinta na i untik a bektas ta duman eya  
sinumila ta kinta na i pintohan a te aduwa a  
hangain a liyon a napede de magtimbang.



Dingan sinabi ni Gepanulusun a, "Ay de oyo mangani natakut i aduwa. Misan ay kintapan eya ni bentay de pintoohan a i ngalan na ay Gebentay ta kinta ni oyo i pagtimok ni Gepanulusun a getotul. Ay inolangan eya ni bentay ta sinabi na a, "Bekot ta untik mangani i tibong mo? Ta wet mo katakutan i liyon ide a oyo ta naggipot yo ni tanikala. Kanya sumila ka ia de gitna ni bektas a wet de kulukaginlan ta ang ka naapdisan."



Ay dingan kita ko a tinumakeg i Gepanulusun nunde liyon ide a gekinkin ni takut. Misan ay tinumalinga eya de pesabi ni bentay ni pintohan. Ay inumoni un liyon ide misan ay an de pan eya pinaapdisan. Kanya getuloy eya de alane ni pintohan ta duman ay nagtanto eya a, "Ayun, napatud man a nekipilong ok nano pan la a abi?" Tinumubeg i Gebentay, "Napatud ta i oyo a beloy ay yinadi ni Panginoon ni kalasan tangani i misan ino a nesila dio ay te pigtuloyen. Ano man i ngalan mo deno ka man inumapo pati deno ka paagow.?" Tinumubeg i Gepanulusun a, "Akō ay inumapo de benwaan a te ngalan a Kahedepan ta paagow ok de benwaan ni Hari de langot. I tagibu a ngalan ko ay Nalagelag misan ay i ngalan ko nano ay Gepanulusun."



Tinanto pa ni bentay de pintohan a, "Bekot  
ta kinabian ka ta nano ay nakalinod di i adow"

Nano ay nagpaliwanag i Gepanulusun tungkul  
de sinumapit de bektas a eya ay napapede pati  
nabut i papel a inampulangan na pa.



Ay dingan pinatinog ni Gebentay un kampana kanya i te ngalan a Migabuya ay binumulwag di tangani matinggesan na bekot ta nagpatinog ide. Ay dingan sinabi ni gebentay diya a, "Be napatud dikamo ay nepilong dio i oyo a lalaki."



Nano ay nagtanto i Migabuya de Gepanulusun ni makmuk. Ay dingan nagpaliwanag i Gepanulusun ti papalano a te gepo eya de pagtotul na pati pesan a sinumapit diya de bektas. Nun iknain ni Migabuya i sinabi a inon ay nagkaluwa de mata na ta sinabi na a, "Geolang ok de mittanak ko tangani pepaabuya ko ikaw dide."



Ay inolangan na i tiluwon pa a mangáyun na ta  
i ngalan de ay i Migtalinga, i An Te  
Kasalanan pati i Pagbuot.

Pagkapasurutsurotan de ay sinotan de eya de  
beloy tangani pinaabuya de eya de kakmukan pa  
ta dingan sinabi de a, "Tumuloy ka a ikaw a  
kinalbian ni Panginoon ta i beloy a oyo ay  
pinayedi tangani te pigtuloyin i magi ikaw a  
getotul."



Nun duman dide de disalad ni beloy ay pinalipa de eya a binoy de i einum a nasurutsurotan hanggen am pa hande i papangan. Pagkapangan ay nasurutsurotan pa ide tungkul de kapiyonan ni Hari hanggen de gitna ni abi. Dingan nagpanalangin ide a nakulukiblagen a napede.





Ta dingan inatid de i Gepanulusun de isin a kuwarto a hanga de ditas ta i oyo ay te bintana a nakayesan de kadipit ni adow. I ngalan ni kuwarto a oyo ay Kapayapaan ta duman ngani inumide i Gepanulusun a napede hanggen de abiabi.



Nun kinabiabian ay naghande i Gepanulusun de pagtotul na. Misan ay te nagsabi ngan diya a an na depat a wawalat i beloy a inon be an na kekita i pesan a libro de a den, kanya tinumalinga eya.

Misan ay pinakita diya ay isin a kuwarto a kapuoyen ni tipide a matande a kasulatan a nabesa na i tungkul de kaapoapohan ni Panginoon ni Kalasan a oyo pati todū duman a eya ay anak nun Makedepat a an te gepo a am pala te kalog. Te solat pala de iwina a libro a nanalo eya de kakmukan a bensa pati de pesan a malot a yinadi de diya. Misan ay loktat a nalipatan na iwina a yinadi diya. Gepamatud pala iwina a libro ni pesan a sinabi ni Magsasabi ide a den nun Makedepat tungkul diya.



Ta dingan inikag de eya de isin a kapuoyen ni sadisadi a armas. Ta ioyo ay hinande ni Panginoon para de gepanulusun ide a getotul. Te utak, salukut, pangsangge pati manga panlaben a panalangin, sapatus a an nagkesede pati pinakita pala diya i armas a ginamit ni manga katabeng ide a den ni Panginoon. Nagkasalig i Gepanulusun de pesan a kinta na.



Nano ay nun buot na di a notuloy de paagowen na ay pinelit de eya a wet tumotul hanggen de isin pa a adow ta sinabi de a, "Be adlas i panahon ay pepakita mi dikaw i Masampat a Kalasan." Ay dingan angan tinumotul i Gepanulusun.

Nano ay nun abiabi ay inikag de eya de kaditasan ni beloy ta pinakita de diya i Masampat a Kalasan. Ay sinumayed i Gepanulusun de kadepit a temog ta kinta na duman i isin a masampat a lugel a te kulukalane a kalasan a kakulukewen a te manga anak pati kapadengan. Ta sinabi de diya a, "I oyo ay Lugel ni Emanuel ta i oyo a lugel ay kasilan ni paagow de benwaan de langot. Be nadetong ka duman ay kekita mo i manga mag-aalage ni topa ay totodu de dikaw i matud a bektas a paagow de benwaan ni Hari."



Nano ay buot na di a masakut a nototul a tambing a nadetong de Masampat a Kalasan. Misan ay sinabi ni magiwinali a, "Noduman kitam ngona de kuwarto a te manga armas tangani aamit mo i sukul mo a armas ta kat matagbu ka nun kalaben."



Pagkatanggap na niwina ay inatid de i Gepanulusun de pintoan ta eya ay nagtanto de Gebentay a magi oyo, "Am man la te gepakasila a agta a paagow de langot?" Misan ay sinabi ni bentay a, "Aysa te duman a i ngalan na ay Naponulusonan ta nano ay padolug di eya." Nagkasalig i Gepanulusun de bereta a inon ta sinabi na a, "Ayset ay peabuyenan ko eya ta magkalane kami ni taanan. Depat a nototul ok a tambing tangani magkasabe kami."



Nun te gepo eya a getotul ay pinelit eya ni magiwinali a nosut ta nasurutsurotan ide tungkul de Magliligtas.

Nun te gepo a gedolug ay sinabi ni Gepanulusun a, "Talage ay nun gesakat ok ay te kahedepan misan ay namas pa a gepakatakut i padolug i." Sinabi ni Migtalinga a, "Oo magi nun dingani ta mahedep i agta a gepakasidong de sadile na. Dehil ngan de inon ay gesut kami dikaw ta mahedep i pesilan mo a gedolug ta depat ka a nesila de lugel a te ngalan a Pagpakasidong ni Innawa."



Misan ay nakadetong dingani, de sidong ay dingan biniyen eya ni manga ayun na ide ni papangan a isin a buti a tayug, tinapay pati anak ni kew ta tinumuloy a lalan de pagtotul na de lugel a Pagpakasidong ni Innawa.





Ay dingan ampa eya gepakalayu ay  
dinumatong eya de te ngalan a Pagpakasidong  
ni Innawa ta natagbu na di i malot a masakut  
a libong a i ngalan na ay Apolyon. Talage  
ngani ay natakut i Gepanulusun ta an na  
katinggesan i yeyedi na. Kasta buot na a  
naapulang o labenan na i kalaben a oyo. Ay  
dingan nagtagbuan dingani ide.



Misan ay i ɾopa ni Apolyon dio ay malot di a masakut ta te kiskis a magi ikan a te ilad a magi kabug ta i singit na pati nguso na ay magi liyon ta de nguso na ay petangaan ni dilab pati asuk ta eya ay hari de lugel a Kahedepan ta buot na a bobuno i Gepanulusun.



Ay sinabi ni Apolyon a, "Ay be nappataan ka mangani de nasasakopan ko ako ngani i hari mo pati ako pala i hari duman. Bekot ta winalat mo i hari mo? Ta be getuloy ka a an getalinga deko ay bobuno ko ikaw." Sinabi ni Gepanulusun a, "Matud ngani a duman ok pinanganak de nasasakopan yu misan ay mahedepan i magtalinga de kabuotan yu ta untik la i pesuwildu yu ta an sukul tangani needup i agta. 'Ta i pebilos ngani ni mammalotin ay i an te kalog a pagkakiblag de Makedepat.' Roma 6:23.

Ay dingan sinabi ni Gepanulusun a, "Anok naampulang ta nangako ok di de Hari ni manga hari ide kanya anak naampulang dikaw. Ta depat mo a matinggesan a buot ko a geabut de Hari ko ta i pesan a katabeng na ay pebilosan na ide ni kapiyonan. Naabut ok di diya la ta ako ay katabeng na."



Misan ay namas pa a nagbulas i Apolyon ta dinogkal na i Gepanulusun ni pandugkal a apoy. Ay salamat ta te pangsangge i Gepanulusun kanya an eya nakna ta binurnut na i utak na tangani lumaben de Apolyon ta iwina a utak ay binoy ni Ispiritu nun Makedepat.



Ta ide ay naglaben ni kalahati a adow a an te nanalo i misan ino. Ta i Gepanulusun ay nanghena di dehil de biged de ulo na pati singit na a nabut pa i hanga a sagu. Dingan nadegmak eya a nabilawen na un utak na.



Nagkasalig i Apolyon ta inesip na nabobuno na i Gepanulusun. Gelane eya tangan bobuno na. Dingan loktat a nabolán ni Gepanulusun i utak na a tinagpuk na de alalang ni Apolyon ta inolang na a, "Talage de tabeng ni Panginoon ko ay nanalo ok de misan ano a kamalotan." Dingan tinagpuk na a liwet i Apolyon.



Ay dingan binuka ni Apolyon i ilad na ide  
ta linumipad a palayu ta natalo eya ta an di  
eya kinta ni Gepanulusun a liwet.



Misan ay nagkapagel a masakut i  
Gepanulusun ay nagkasalig pan eya ta nanalo  
eya de Apolyon de padean ni utak na a matalas  
a te aduwa a talom ta i utak a oyo ay magi i  
Surut nun Makedepat. Ta tinumingala de langot i  
Gepanulusun a sinabi na a, "Talage a  
gepasalamat ok dikamo a linigtas ok yu de  
nguso ni liyon pati Apolyon. Salamat a liwet  
de yinadi yu."





Ay dingan te kumut a nangoma diya ni manga agid  
ni kew a geboy ni edup ay namit na ngani ta  
tinapal na de biged na ide ta napiyon ngani  
nun nanon pala.



Pati linumipa eya a namangan ni papangan a hinande para diya.

Nano ay nun eya ay tinumibong di a liwet ay tinumuloy eya de pagtotul na. Misan ay nabbolan na la un utak pati pangsangge ta sinabi na a, "Sigudu te natagbu ok pa a kalaben ko."



Ta de pangnenop ko a tuloy ay kinta ko a de lawis pan ni oyo a kalasan ay te isin pa a lugel a te ngalan a Kalebunan. Nano ay kinta ko ngani a dinumatong i Gepanulusun de kalog ni lugel a oyo ta natagbu na i aduwa a lalaki a gegikan a paampulang di. Nano ay nagpaliwanag ide de kamalotan de paagowen ni Gepanulusun ta sinabi de a, "Iwina a lugel ay madumos a masakut ta kinta mi duman i sadisadi a gepakatakut ta te libong a inumapo de disalad ni putok ta inikna mi pala i geolang ni malagdu pati gealaloy de lugel a madumos. "Misan inikna ni Gepanulusun i pesan a inon ay sinabi na a, "Ay deko ay notuloy ok ta buot ko a nadetong de Masampat a Benwaan."



Misan ay de pangnenop ko ay kinta ko a de kadepit a awenan ni bektas a paagow de Kalebunan ay te madisalaḁ a kanal. De kadepit pan a awile ay te talbok pan a kalutetan ta dio ay panganib ngani. Misan ay i matud a bektas ay de gitna ni oyo a ampan malawa.


Talage ngani a nahedepan i Gepanulusun a getotul de kadepit a be kadegdegen ay panganib misan ay madumos dio a an na pekita i pesikaden na. Misan ay nun duman di eya de gitna ni oyo a bektas ay kinta na i bulsut a paagow de Impiyerno a petangaan ni asuk pati dilab pati inikna na i gepakatakut a alaloy a magi te hedep a masakut.



Nano ay depat a i Gepanulusun ay kakaloben na un utak na ta aamit na ay isin pa a panlaben na a te ngalan a Pagpanalangin. Dingan nagpanalangin eya a, "Panginoon ko alagean yu i kaliduwa ko de oyo a panganib." Ta kasta i pesan a kalibongan ay linumane de Gepanulusun ta inolang na a, "Getotul ok de kapangyedihaan ni Makedepat." Ta winalat de eya.




Dingan nun kinabiabian ay linumingoy i Gepanulusun de inapoan na a panganib nun abi a inon. Ta kinta na i madisalaḁ a kanal ta de dibilew niwina ay makelutit. Kinta na pala i añ malawa a bektas a inapoan na pati kinta na de alayu i sadisadi a malot a libong ta nano ay dehil de mattalang ay nagkatakut i kalibongan a gelane.



Misan ay tinumuloy i Gepanulusun de pagtotul na.

Nun dinumatong eya de pagotan ni isin a bungku ay gepagelawag de pulupalebut na ta kinta na de unahan na i te ngalan a Naponulusonan ta inumolang eya a, "Ilatin ok mo." Misan ay tinumubeg i Naponulusonan a, "An napatud ta napaabut deko a gebilosan."




Nun inikna na inon ay te gengsa i  
Gepanulusun dingan ginumikan i eya tangani  
abutin na ta kasta gepakaditas i Gepanulusun  
de sadile na ta inesip na a, "Anok magi  
Naponulusonan a migkatakut."

Dehil de inon ay an pmasden i pesilan na  
kanya nadegmak eya.





Nun kinta ni Naponulusonan a nadegmak i Gepanulusun ay inumampulang eya. ta pinagiyus na ta getotul ide a sabe a nagkasalig a nasurutsurotan tungkul de pesan a sinumapit de inapoan de.



Tinanto ni Gepanulusun de ayun na a, "Nun tinumotul ok de lugel tam pide pa a adow dingan ka tinumotul?" Tinumubeg i Naponulusonan a, "Tinumotul ok duman nun anak di gepakatiis ni gesapit dena. Binuot ko a magkakoloy kitam misan ay napaona ka di kanya ako ay lalan." "Ano i bereta de Malumoy?" Tanto ni Gepanulusun. Tinumubeg i Naponulusonan a, "Nun dinumatong i eya ay peilokan pati pelibek de eya." Tanto ni Gepanulusun a, "Nasurutsurotan kamo man?" Tinumubeg i ayun na a, "Nagkatagbuan kami de benwaan tam misan nun kinta ok na ay sinumila eya de dibilew nun bektas ta nagkamamos sigudu de yinadi na."



Dingan tinanto ni Gepanulusun a, "Uluano man i sinumapit dikaw nun pagkang mo dio?" Ay dingan tinumubeg i Naponulusonan a, "Nakasila ok pan de Kalutetan a kinadegdegen mo ta nakadetong ok nunde pintohan a an te panganib. Misan ay de bektas ay natagbu ko i masampat a mahuna a te ngalan a Malot a Mahuna ta nangako eya deko ni makmuk a kasayahan. Misan ay tinaklopan ko i mata ko tangani ang ko pekita eya. Ay gebulas eya deko misan ay tinumuloy ok la a an gelingoy."



Dingan tinanto eya a liwet ni Gepanulusun ni magioyo, "Te duman ka paman a panganib de sinilan mo?" Sinabi liwet ni Naponulusonan a, "Nun ako ay dinumatong di de sidong ni pagotan a Kahedepan ay te natagbu ok a isin a laki a i ngalan na kon ay i Tagibu a Aden. Ta i ngalan ni petaanan na ay Pigdeyaan ta sinabi na deko a, "Be getaan ka deko ay ikaw i gemana ni pesan a adi ko."



"Tinanto ko eya a magi ano i beloy na pati pide i katabeng na. Sinabi na pa a napa de beloy na kon i pesan a kasalegen dio de putok i ta eya kon ay te tiluwon a anak a mahunain ta be buot ko kon ay napani bebi ko ide a tiluwon ta ide ay katabeng na pala a i ngalan de ay i Kabuotan ni Lawes, Migkasinna pati Migpakaditas. Misan ay inesip ok ngona a kasta piyon nun ay dingan naisipan ko pala a an nun piyon."



Sinabi na a tuloy a, "Kanya pan natanom pan de esip ko a misan magi ano i sinabi na a masampatin tungkul deko ay pagdetong pan de beloy na ay panggegetang ok na a alepin. Kanya pan pinatimok ko eya ni pagsurut ta talage a anak ngani nalane man la de pintohan ni beloy na. Dehil ngan de inon ay pinagsurutan ok na ni maapdisin ta sinabi na pa a te isin kon a agta a gegemit eya tangani guluin ok na de sesilan ko pati de kaliduwa ko. Dehil de inon ay binuot ko a nototul misan ay binotang na ta i kabityag ko ay i kalahati a lawes ko ay napadugeng diya. Kanya napaolang ok ni magioyo a, "Ako ay agta a kakulukalbi a an te tibong." Roma 7:24. Ay dingan winalat ko eya a tinumuloy ok a sinumakat de pagotan.



Misan ay nun ako ay duman de kalahati nun sakat ay linumingoy ok ta kinta ko i isin a agta a gegikan a palane deko ta dinatongan ok na ngani de isin a kalinongan a lugel a sinabi yu deko a kinapedean mo."



Sinabi na a tuloy a, "Ay nun ako ay dinatongan ni agta a oyo ay tinesud ok na ta ako ay nabegsak ngani a kasta nalibun di. Dingan nun ako ay kasta napagiyus ay tinanto ko eya bekot ta pinapayin ok na. Ta i tubeg na deko ay dehil de untik a pagtalinga ko de pagkaagta ko a den a i tagibu a Aden. Ta linapdit ok na ngani a liwet de alalang ko ni malagdu ay nabut pan di i pagkaagta ko a magi nun tagibu. Kanya nun makatingges ok ni disapow ko ay nag-aged ok diya ni kalbi tangani eyen nelibun ok. Ta liwet ok nadla a linapdit ta talage ay peesip ko ay bobuno ok na di. Misan ay te isin a agta a dinumatong a nagsablow diya."





"Ino man nun." Tanto ni Gepanulusun.  
Tinumubeg i Náponulusonan a, "Nun tagibu ay  
ang ko peabuyenan misan ay nun pagsila na de  
alane ko ay kinta ko a te bulsut de kumut na  
ta nun nanon ko la ngani natinggesan a eya i  
Panginoon tam a i Hisu Kristo. Dingan  
sinabi ni Gepanulusun a, "Un agta pan a  
sinumoysoy dikaw ay i Moises ta an te misan  
ino a geligtas diya ta an eya nagkakalbi de  
belang gesede de pagdodul."



Misan ay sinabi a tuloy ni Gepanulusun a, "Ino ino pa i natagbu mo de sidong ni Kalasan a te ngalan a Migpakasidong?" Ay dingan tinumubeg i Naponulusonan a, "Aysa te duman ta i ngalan na ay i An Nagkasalig ta buot na a umampulang ok di ta kakoloy ok na ta sinabi na a, " Ay dena de lugel a inon ay ang kamo napa ni maditas." Sinabi ko diya a, "Depat ngona de agta a tagibu ay i masidong a innawa a wet nagpakaditas ta i Makedepat la i gepakaditas. Ta i misan ino a gepakaditas de sadile na ay napa ni masidong eya de isin a adow. Misan ay buot ko a getalinga de den a agta a naketingges a pepeta ko i pagpakasidong ni innawa a wet i pagmaditas."



Tinumuloy ni Naponulusonan a, "Te natagbu ok pa a i ngalan na pan ay i Kauluamamos ta sinabi na deko a, "Talage a kakulukalbi a pinakamasidong pati kauluamamos i agta a naaged ni tawed de pinagkasalaan a geaged ni tawed de pagdeya tam."



Dingan tinanto ni Gepanulusun a, "Ano i tubeg mo diya?" Kanya sinabi ni Naponulusonan a, "Ay talage a nun tagibu ay ang ko katinggesan i totubeg ko diya misan ay naisipan ko a i sinolat de surut ni Makedepat a, I mahalage de pekita ni agta dio de putok i ay an te kabuluhan a unabis de pekita ni Makedepat." Sinabi ko a tuloy a, "I misan ino a gepakasidong de innawa na a geyedi ni kabuotan ni Makedepat ay an namamos pagdetong ni Panginoon a Hisus. Misan i agta a an gepanulusun dehil de amamos na ay talage a namamos eya pagdetong ni Panginoon ta an eya te natotubeg. Ta halimbewa be kekiplagen ko i Panginoon ko a naabut ok dikaw ay talage a namamos ok a natagbu diya pagdetong na. Magi non i sinabi ko de kauluamamos dingan tinumuloy ok a gekanta."



Nano ay kinta ko de pangnenop a de pagtotul de ay inumabut i isin a lalaki a te ngalan a Migsurut. Ta sinabi de diya a, "Ayun noduman ka man de langot pala?" Tinumubeg eya a, "OO noduman ok ngani de iwina." Dingan sinabi diya ni Naponulusonan a, "Nosut ka dikami tangani masurutsurotan kitam ni pekinabengan tam" Dingan nasurutsurotan ide ni untik a panahon.



Nun gesurutsurotan ide ni untik ay linumane i Naponulusonan de Gepanulusun ta sinabi na a, "Talage a piyon yo a agta ta matapang eya a gepamatud a magi ikitam."

Misan sinabi ni Gepanulusun a, "Talage ngani a de padean ni dila ni oyo a agta ay nadedeya na i pesan a an geaabuya diya ta piyon i surut na misan ay an te kabuluhan. I ngalan na ay Migsurut ta getaka ok pan bekot ta ammo eya peabuyenan a i kataanan na ay de alane tam la. Sinabi ni Naponulusonan a, "Be maginon ay dinaya ok na. Ano man i dapat ko a yeyedi tangani walatin ok na?" Nano ay tinumubeg i Gepanulusun a, "Patalikngan mo i sasabi ko ta talage a be an la binowon ni Makedepat i innawa na ay wawalat na ikaw. Pagsabian mo eya a masakut tungkul de kapangyedihaan ni Makedepat pati kaligtasan na ta talage a nototul i eya ta an na buot i pagligtas a matud ni Makedepat."



Ay dingan nakisabe i Naponulusonan de  
Makisurut ta sinabi na a, "Kumusta ka."  
Tinumubeg i Makisurut a, "Piyon a masakut ta  
naesip ko a nasurutsurotan kitam a tuloy."  
Dingan sinabi ni Naponulusonan a, "Piyon be  
nasurutsurotan tungkul de pagkalbi ni  
Makedepat dikitam tangani ketinggesan tam be  
te pagpanulusun kitam pa o eyen."



Dingan sinabi ni Makisurut a, "Piyon yo a tanto ta napahande ok a notubeg dikaw. Be i kosa a tabeng ni Makedepat ay nadde innawa ni agta ay gelaben de kasalanan." Dingan sinabi ni Naponulusonan a, "Ay kanin ngona ta esipin tam a uluisin ta de esip ko ay namas yo a gepatingges a nagkagengsa i innawa ni agta de kasalanan."






Misan ay sinabi ni Makisurut a, "Misan ay bekot ta bukud i gelaben de kamalotan pati nagkagengsa de kamalotan." Ay dingan tinumubeg i Naponulusonan a, "Talage a magkabukud nun ta te duman ok di a inikna a magsasabi a getodu ni malot i kasalanan misan ay peyedi de la be an pekita ni pedoduan. Ano be ikaw nagkaduman kaman ni kosa a tabeng ni Makedepat de innawa mo pati pagyedi?" Sinabi na a tuloy a, "Ta i pagpanulusun mo pan ay kasta de surut la a an de yedi a te kamatoden." Ay dingan i Makisurut ay kasta nagulu dingan tinumubeg a, "Ang ko ngani peasahan a i pesurutan ta ay magi oyo."



Sinabi ni Naponulusonan a, "Talage a an mahedep a gesurut ni piyon misan mahedep a geyedi be an getabeng ngona i Hisus. Ta an naligtas i misan ino a agta de padean ni piyon a pagyedi. Ta kasta i esip mo ay magi oyo, a be i agta a te relihiyon ay napatud a geyedi ni misan ano a buot na a yeyedi, a magi pagbugnang, pagbutil, pagkasinna pati pagsabi ni misan ano a malot." Nun inikna inon ni Makisurut ay nabowon a malungkut i mukha na ta sinabi na a, "Nototul ok di ta ang ka piyon a kasurut ta i pesurut mo ay tungkul la de kasalanan ko."



Ay dingan nagkoloy a liwet i Gepanulusun  
pati Naponulusonan ta sinabi ni Gepanulusun  
a, "Pesabi ko ngani ay nangyedi i magi  
sinabi ko dikaw ta an na buot a bobowon i  
ugeli na kanya kinumiblag eya dikaw, ay yadi  
pa i magi nun ta be eyen eya kinumiblag ay  
depat a palayuin tam tangani ang kitam  
naddugeng de kasalanan na, ta te duman  
de surut nun Makedepat a, "Umelag ka de  
maginon a kalase a agta." 1 Timoteo 6:5.



Misan ay sinabi ni Naponulusonan a, "Ay nagkasalig ok ngani a nakasurut ko eya tungkul de kaligtasan na ta kati mag-uluesip eya nano. Nano ay anok behala be nakiblag eya de Makedepat magpakapide man." "Ta sinabi ni Gepanulusun a, "Talage ngani a matalang pan i sinabi mo a inon diya. Piyon tebe be i pesan a gepanulusun ay malinow i surut de tungkul de Surut nun Makedepat tangani i geikna ay gebowon pala i ugeli de misan ay ang kitam te nayeyedi de an ide te buot a getalainga."



Nano ay getuloy i aduwa de paagowen de.  
Ta dehil ngani de pasurutsurotan de ni te  
kabuluhan ay te kasalegen ide a getotul. Ta  
be an ide gekoloy ay an te kasalegen de  
pagtotul de ta i bektas dio a paagow de langot  
ay magi ilang.



Nano ay nun alane ide de kaginlan ni ilang ay kinta de i isin a agta a napaabut dide. Dingan sinabi ni Gepanulusun a, "I oyo ay i piyon a ayun ko a i Magtutodu." Gelane dide i Magtutodu ta nagbeti eya dide dingan sinabi na a, "Papalano man i pagtotul yu?" Dingan sinabi de diya i sinilan de a kahedepan de bektas. Nagkasalig i Magtutodu ta sinabi na a, "Talage a nagkasalig ok a masakut misan ay an dehil de kahedepan yo manga pagsobuk ta dehil ngani de nanalo kamo a ang kamo inumampulang Kanya nano ay te bilos kamo a geilat de langot. Kanya tumuloy kamo a te piyon a ugeli ta esipin yu la i inapoan a lugel. Ta i katabeng yu dio de putok i ay i Makapangyedihan ta i tabeng na ay magi tabeng ni Hari a getaan de langot. Ta tumuloy kamo a geengat a masakut hanggen nakadetong kamo duman."



Pagkatapus ay pinasalamatan eya ni Gepanulusun dehil de sinabi na a nagpatibong de innawa de ta tinanto de i Magtutodu a, "Dehil de ikamo ay an Magtutodu la ta Magsasabi pala ay sigudu katinggesan yu ti uluano pa a kahedepan i sesilan mi pati ti papalano a nanalo kami de inon." Kanya sinabi ni Magtutodu a, "Manga anak ko a pebuot sinabi di dikamo de Surut ni Makedepat a depat a nesila kamo ngona de makmuk a kahedepan dingan kamo nadetong de langot. Misan ay alane kamo di a nadetong de isin a benwaan a te kalaben kamo a nobuno de i kamo o isin dikamo. Misan ay pesabi ko dikamo a wet magulu i esip yu ta tumuloy kamo a mag-engat de pagpanulusun hanggen de kalebunan ta be natapus iwina a boboy ngani dikamo ni Hari i depat a bilos yu."



Pagkatapus ninon ay kinta ko de pangnenop  
a pagkabulwag de de lugel a ilang ay  
dinumatong ide de isin a benwaan a te ngalan  
a An Te Kabuluhan, ta te duman pala a  
Kasayahan a An te Kabuluhan a kattindean ni  
sadisadi a pantuksu.





Nano ay naloy ngani a panahon a dio i  
 pigselan ni gepanulusun ide. Ta i manga  
 ponó ni benwaan a oyo ay i Belsebul, Apolyon  
 pati manga Lebu a libong. Ta hinande de i  
 pesan a pandeya de pesan a gesila a paagow de  
 langot. Ta misan ano a buot ni lawes a  
 pantuksu ay te duman.



Nano ay nun gelane un aduwa de kasayahan ay i pesan a agta ay gepakalawag dide dehil de bukud a kalase i bedu de pati surut de. Ay peesip ni agta a ide ay lolonglolong ta peilokan de ide ta pinayin de a i oyo a manga agta ay an te kabuluhan."



Sinabukan ni manga getinde a getuksu dide  
 Gepanulusun a pinakita de i pesan a buot ni  
 lawes. Misan ay maksa i innawa de a an de  
 buot ta katinggesan de a an te kabuluhan i  
 petinde de. Ta petaklopan de i talinga de a  
 geolang a magi oyo, "Layuin yu i mata ko de  
 an te kabuluhan."



Misan ay te isin a magtitinde a nun kinta na a an de buot i manga tinde ay tinanto na ide a te libek a, "Ano i pelawag yu pati ano i buot yu a nanggetang?" Tinumubeg ide, "I pelawag mi ay an dio de putok i ta duman de langot ta i buot mi a gegetang ay i kamatoden a an te kalog." Dehil de oyo ay minalot na pa i aduwa.





Ta tinanto na dide ni makmuk a tanto  
dingan tinumubeg ide a, "Ikami ay an tagi dio  
ta paagow kami la de bensa mi a sadile a i  
Herusalem de langot."



Misan ay peesip ni manga getanto ide a ide  
ay gegulo la ni manga tindehan be an  
lolonglolong. Dehil de iwina ay pebelbel de  
ide pati pesapwaran di ide ni lutit.



Dingan pinuoy i aduwa de kolongan a bekal de pekita ni pesan a agta. Ta yinadi de pa i pesan a buot de de aduwa ta peilokan de a tuloy. Ta nagilok i ponu ni magtitinde dehil de yinadi de de aduwa. Misan ay petanggep ni Gepanulusun pati Naponulusonan a masidong a innawa i pesan a pagtoben dide.





Dingan natulutaloan i manga agta duman  
dehil de aduwa a nabilanggo ta te duman a  
nagkakalbi te duman a eyen.



Ta i kakmukan ay dinumuman de Huwis ta  
pesumbung de i aduwa ta ide kon ay i dehilan  
ni pesan a gulu.



Gebulas i huwis ta sinabi na a, "Belbelin yu  
dingan addein dio."



Nano ay binelbel de ngani un aduwa dingan  
ginapus de a inikag de huwis.



Ta misan ano i yinadi de dide a  
malot ay getiis ide pati an ide gesabi ni  
misan ano a bilos dide. Dehil di de piyon la  
i peyedi de ay makmuk pa i te kalbi dide.  
Misan namas pa i gengsa ni kalaben de ta te  
belak ide a bobuno i aduwa.



Nano i huwis a pinangaddean de ay i te ngalan a Gemalot de Kapiyonan. Ta i manga sumbong ay magi oyo, "I oyo a manga agta ay kalaben ni magtitinde ide a gegulu pala a tuloy de manga tindehan. Dehil de aduwa ay nabinsa i manga agta ta i kakmukan ay te buot a nosut dide misan an nun napaayun de dodul ni hari tam."

Misan ay tinumubeg i Naponulusonan a, "Am mi yinadi i misan ano a malot dio de benwaan yu. Pati tungkul de hari yu a Satanas ay kinapoyen mi di eya ta nano ay ikami ay te piyon pa a Hari ta i paagowen mi ay de benwaan na."



Pagkasabi ni Naponulusonan ni non ay sinabi nun huwis de manga agta, "Be te duman i misan ino a gepamatud de yinadi a malot ni aduwa ay umuddi."

Dingan inumuddi i tiluwon a te ngalan a Migkasinna, Gepanulusun de an Matud pati i Migpakaditas.



Ta sinabi de, "I oyo a aduwa ay pesede de i peyedi mi dio ta pesabi de a i peyedi mi dio ay kalaben de matud a Hari. Pesabi de pala a i hari tam a Satanas ay katalo ni matud a Hari de ta eya kon la i Hari ni pesan a hari."

Tinumubeg i Naponulusonan a, "Ang kami nagyedi ni misan ano a malot dikamo ta i peyedi mi la ay de gepakasalig de Hari mi a Makedepat"





Ay dingan inakit ni huwis i pineta na a maghahatol na ide a ti ano i yeyedi de de aduwa. Ta i ngalan ni maghahatol ide ay i Migpakialam, i Migbutil i Gemalot de Kamatoden, i Kamalotan, i Mig-gulu, i Migkagengsa, pati kakmukan pa.

Dingan hinatolan de i Naponulusonan a depat a bobuno ta inon i belak de nun tagibu pa.



Dingan dinodul ni huwis, "Be magi nun addein yu i Naponulusonan de lugel a pigbunuan ta pahedepan yu ngona eya a masakut dingan bunuin."



Dingan inadde de i Naponulusonan  
de lugel a pigbunoan ta inubeden de eya.



Ta binelbel pati sinuntuk de eya.



Dingan tinulutampal de eya.



A binonglag de pati tinigbis de nun utak.



Be natapus iwina ay tinagpok de ni magi  
utak.



Dingan de inapoan ay ginapus de de kew a  
sinunug a tuloy ta magi nun i pagkalibun ni  
Naponulusonan.





Misan ay kinta ko de pangnenop ko a de idogen ni kaagtaan i sakoyen a nauwey ni kabeyo a geilat de Naponulusonan ta sinakoy de ngani a paagow hanggen de pintohan ni langot. Misan ay i manga agta duman ay an de kinta i sakoyen a pinakang ni Hari a nangamit de Naponulusonan pati an de pala katinggesan de pagbunu de diya ay maparipari pa eya de kataanan ni Hari a Makedepat de langot.



Misan ay pinuoy de a liwet i Gepanulusun  
de kolongan misan ay de tabeng ni Makedepat  
ay linumimok eya a binumulwag eya pala de  
benwaan.

Misan ay nun getotul eya ay te duman  
a lalaki a napaabut diya a te ngalan a  
Pag-asa a inumapo eya de benwaan a An Te  
Kabuluhan ta kinta na i edup ni Gepanulusun  
pati Naponulusonan kanya te buot eya  
a naabut dide.



Dingan nagkasungdu i aduwa a paagow de langot a gekoloy. Ta sinabi ni Pag-asa a, "Te makmuk pa a agta de benwaan a An Te Kabuluhan a te buot a naabut dikitam de isin a adow."



Nano ay pag-apo de de benwaan ay inabut de i isin a lalaki ta tinanto de eya ti deno eya inumapo pati ti deno eya paagow. Tinumubeg eya a, "Ako ay inumapo de benwaan a Masampat a Surut ta paagow ok de benwaan de langot." Misan ay an na sinabi dide i ngalan na ta sinabi na a tuloy a, "I mangayun ko ay pulus a maditasin pati mayamanin a agta de Benwaan a Masampat a surut. Ta i relihiyun mi ay bukud ni untik de kakmukan ta magi oyo i pagyedi mi. Ang kami gelaben de misan ano a kahedepan ta geelag kami tangani ang kami te kahedepan."



Misan ay inabuyenan ni Gepanulusun eya ta sinabi na a, "Ikaw mangani i te ngalan a Migpeta." Ay dingan tinumubeg eya a, "An inon i ngalan ko a matud misan ay pengalanan ok ni te gengsa deko ninon misan be eikag ok yu ay katinggesan yu a piyon ok a ayun."

Ay dingan sinabi diya ni Gepanulusun a, "Nano ay be nosut ka dikami ay depat ka a napahande de pagtotul piyon man o eyen i paagowen tam. Ta kaelangan pala ay notuloy ka de pagpanulusun misan naditong i gepakatakut, mahedep o kasalegen dikitam."



Nano ay kinta ko de pangnenop a kinumiblag  
i Migpeta dide Gepanulusun pati Pag-asa ta  
an na buot a getalinga de sinabi de ta  
tinumuloy ide.

Misan ay paglingoy ni isin dide ay kinta  
de i tiluwon a lalaki a geabut de Migpeta ta  
i ngalan de ay ide Migbuot de Kuwarta, i  
Mademu, pati i Migkasinna ta magkaiskuwila  
ide, ta i magtutodu de duman ay i te ngalan a  
Migpintas ta tinoduan ide ni magtutodu a oyo  
ni pag-amit ni misan ano a buot de misan  
makabunu pagbutil pati de pagsabi a ide ay  
gepanulusun misan an la.



Nano ay gepakisurut a tuloy i Migpeta de manga ayun na ta sinabi na a, "An naketingges i aduwa iwina a agta a getabeng de sadile de ta misan te kahedepan de pagtotul ay getiis la ide a getalinga pa de Makedepat. Ta be ako ay magi ide ay talage a peilat ko i piyon a pagkakataon dingan ok notuloy misan be an te panganib ay ang ko tatagu i pagpanulusun ko."



Pagkalane de de aduwa tinanto ni isin dide a, "Halimbewa te agta a an matud a gepanulusun misan de pekita ni kaagtaan ay kasta matud a gepanulusun ay dehil de kasta pagpanulusun na ay petanggep na i bilos na dio de putok i. Piyon nun o eyen?"

Tinumubeg i Gepanulusun a, "An mahedep nay a tanto ta misan i bowon a gepanulusun ay katinggesan na i tubeg de iwina. An piyon i pagpanulusun tam de Kristo be de pekita la ni agta tangani naamit tam i misan ano a buot tam. Ta an ngani te kabuluhan i magi nun a pagpanulusun."





Nun sinabi ni Gepanulusun iwina ay an nakayamyam i apat ta nagkamamos ide ta ide ay nainapoan di de aduwa.

Dingan sinabi ni Gepanulusun de ayun na a, "Be an ide nappatud a nouddi ide de hokoman ni agta ay papalano a nouddi ide de hokoman ni Makedepat."



Nano ay tinumotul pan di ide Gepanulusun pati Pag-asa ta ide ay nakadetong de Kalasan a te ngalan a Kayamanan ta dena ay te mena a pelak. Misan ay nun de bektas a paagow nunde mena ay kinta ko i te ngalan a Demas a geuddi. Ta peolangan na ide Gepanulusun pati ayun na ta pesabi na a, "Dumio kamo ta te pekita ok dikamo."



Misan ay ide Gepanulusun pati Pag-asa ay an ide gelingoy ta nagkatakut ide ta kasta gedeya i Demas. Ta besta tinumuloy ide la.

Misan ay nun dinumatong i napaabut ide dide ay inolangan pala ide ni Demas ta kinumang ide ta kapide man ay an ide kinta a liwet.



Nano ay kinta ko de pagnenop ko a dinumatong i getotul ide de isin a lugel ay de dipa ay te loma arigi ta i oyo ay alane nun de bektas. Misan ay talage a nag-taka ide ta i oyo ay kasta liburto ni mahuna. Ta de kadepit ni ulo ni oyo ay nabesa ni Gepanulusun a, "Wet yu kelipatan i bebi ni laki a Lot." Kanya katinggesan de a i oyo a arigi a asin ay i bebi ni Lot ta naesipan de pala a kanya napa ni asin eya ay dehil de linumingoy a te sinna nun ide ay linumimok de benwaan ni Sodoma nun sakadow.



Dingan kinta ko a nakadetong ide de  
Masampat a orat ta nun ide ay inuminum de  
orat ay kasta nabut i pagel de. Nano de  
magduludipa ni orat a oyo ay makmuk a kew a  
te bukudbukud a anak ta namangan ide ni piyon  
a anak ni kew ta te duman pala i masampatin a  
bulaklak pati kademoan ta ide ay nagpaimloy  
pati nagkapede ni piyon de oyo a lugel.




Nano ay pagtotul de duman de orat a masampat ay dinumatong ide de bektas a likoliko a kabetoan. Ta i pesan a masampat ay naddeinapoan de. Dingan napagel ide a maapdis pa i singit de ta i buot de a masakut ay un bektas la a masampat.

Nano ay i bektas a petotolan de ay alane de Katipong a masampat a lugel ta te duman a untik a bektas a kademoan. Ta sinabi de a, "Ay kasta padepade i paagowen ni oyo a aduwa a bektas kanya yadi pa a noduman kitam de iwina ta kapiyonan pa a bektas."



Misan nano ay an mahedep i pagtotul de ta getuloy ide a nagkasalig. Misan ay nunde paagowen de ay kinta de i agta a te ngalan a Katinggesan Ko i Pesan ta ide ay nagtanto duman a, "Deno man paagow i bektas a oyo." Dingan tinubeg na dide a, "I oyo ay paagow de benwaan de langot." Misan ay kinabian di de duman a napaabut de oyo a lalaki kanya an de kinta i naona dide. Ay dingan loktat a nadeqdeg un naona dide de isin a libtong a bulsut ta nabigedgigedin dingani i lawes na.



Misan ay inolangan ni aduwa un nadeqdeg misan ay inikna de la i gealaloy. Angani naloy ay tinumapok ni marages pati te lagpak a malagduin pati kilat ta am pala naloy ay binumulangay un bektas.

Dingan linawag de i bektas a paampulang misan ay an de di kinta ta madumos di a masakut ta katinggesan de nano a mamiyen a wawalat de un bektas misan mahedep a masakut a naampulang.





Nano ay nakakita ide ni kalinongan ta duman  
ide linumipa misan ay dehil ngani de pagel de ay  
napapede ide hanggen de abiabi.



Misan ay am pan alayu de inidean de i isin  
pala a hanga a beloy a te ngalan a Kataanan  
ni An Gepanulusun ta i te adi ni oyo ay  
isin a genggeng a matapang a te ngalan a  
Migtakut.

Nun kinabiabian ay nakitan ni oyo a  
genggeng ide Gepanulusun pati Pag-asa a  
kapulupede kanya rinesagen na ide a binogbog  
ta tinanto na ti ano i peyedi de de sakop a  
inon.



Misan ay sinabi de i kamatoden a ide ay  
getotul a nalagelag duman. Kanya nagbulas un  
genggeng a sinabi na a, "Dehil de sinumilong  
kamo de nasasakopan ko i a an te geaket ay  
depat a nosut deko." Nano ay pinaona nun  
genggeng un aduwa de beloy na.



Ta ide ay binilanggo na de sidong a isin a kuwarta a madumos, madiplut pati mabungtot ta tiluwon ide a adow dio a an gepangan a ampa geinum ni misan untik a orat ta napede pa ide de kabetoan.

Nano ay dehil de mahena a masakut i innawa de a an te pag-asa ay malungkut ide a masakut.



Nano ay un genggeng a oyo ay te bebi a te ngalan a An Te Pag-asa. Ta un laki ay nagtanto ngani de bebi na ti ano i yeyedi de binlanggo ide. Misan ay sinabi ngani ni bebi na a depat a ide ay pahedepan ni an te kalbi.



Nano ay nun kinabiabian ay binalbel na ide  
a masakut ta dingan winalat na ide a kasta  
nalibun di. Misan ay getiis dila ide a an  
geyamyam.



Nun sinumunud a abi ay inikna nun genggeng pati bebi na un aduwa a te edup pa. Dingan sinabi nun bebi nun genggeng a, "Dumuman ka di ta pagsabian mo ide a magpakalibun,"


Dingan dinumuman eya de kolongan ta sinabi na dide a, "Ang kamo di nakobulwag dio. Yadi pa a magpakalibun kamo di."



Misan ay an tinumalinga i Gepanulusun pati Pag-asa de sinabi na ta gelibengan ide. Magi nun maghapon misan maapdis i lawes de a kakulukalbi.

Nano ay dinodul ngani nun bebi na un genggeng nunde aduwa tangani ikagin na ide de bekoran ta pakitain na dide i kaksan ni manga agta a gesila de putok de tangani malungkut ide.





Nagkatakut i aduwa nun kinta de inon.  
Misan ay an de binuno i sadile de.

Dingan inampulang na ide de kolongan ta  
dingan tinanto na de bebi na a, "Ano i  
peyedi ko dide?" Misan ay tinumubeg i bebi  
na a, "Makati man te peasaan ide a  
gepabulwag dide o kati te sose ide tangani  
nakobulwag ide." Sinabi nun genggeng, "Ay-o  
mangani pabiyaan mo ta lalawag ko diage."



Misan ay un aduwa pan a bilanggo ay nasurutsurotan ide a ti papalano a nobulwag duman. Ay loktat a inumuddi i Gepanulusun ta sinabi na a, "Talage a mangmang ok a masakut ta nalipatan ko a te sose ok mangani a te ngalan a Pangako. Katinggesan ko ngani a nakayesan ni oyo i pesan dio a naabetan." Ay dingan tinumubeg i te Pag-asa a, "Amitin mo ngani ta sobukan mo."



Ta tambing ngani a sinubukan ni  
Gepanulusun ta nakayesan ngani i pintohan  
pati i pintohan a bekal de bekod, misan ay  
mulumahedep ta de oyo ay tinuminog kanya  
napagiyus un genggeng.



Ta sinoysoyin na un bilanggo ide misan ay  
sinumpong eya kanya an na ide dinatongan.

Kanya tinumuloy di un aduwa hanggen  
nakadetong ide a ligtas de bektas a paagow de  
benwaan ni Hari.



Nun duman pa ide ay pinuoy de i karatula a gesabi tungkul de panganib a magi oyo, "I oyo a bektas ay paagow de beloy ni genggeng a te ngalan a Migtakut ta eya ay katalo ni Hari de langot ta te belak eya a bobuno i manga agta ni Hari a napasila dio."



Ay dingan tinumuloy di un aduwa hanggen  
nakadetong ide de Masambat a Kalasan a adi ni  
Panginoon de langot. Ta sinumakat ide duman  
tangani kitain de i halaman pati manga kew ta  
namangan ide ni anak ni kew.



Ta duman pala de pagotan ay te kinta ide a mag-aalage a geungot ni topa de ide de kaginlan ni bektas. Ta i ngalan de ay i Katinggesan, i Naketingges, i Mag-engat pati i Kamatoden.

Nano ay nagtanto un aduwa de Mag-alage ide tungkul de kalasan a inon pati nagpaliwanag ide de pesan a sinumapit dide de bektas. Dingan ide Gepanulusun pati te Pag-asa ay inaket ni mag-aalage ide a gepaimloy ide ta biniyen de ide ni papangan.




Nun sinumunud a adow ay sinabi ni  
Mag-aalage ide de aduwa a piyon pa a  
gepasial ide a pesan de kalasan tangani kitain  
de i pesan a binuot de a kekita. Angan naloy ay  
nakadetong ide de pagotan a te ngalan a Mali.

Nun duman dide ay inumusdong ide nun de  
kabetoan a tobbe ta i kinta de duman ay i  
manga kaksan ni gepinagtutul a nalibun duman  
a nadegdeg. "Ano i kabuluhan ni oyo?" Tanto  
ni Gepanulusun. Dingan tinumubeg i Mag-aalage  
ide a, "Iwina ide a manga agta ay an ide  
inumabut de matud a dodul."





Nun natapus nun ay inikag de ide de isin pa a pagotan a te ngalan a Mag-engat. Nun inumusdong ide de sidong ay kinta di i tipide a agta a natulutotul de taporan a kasta bulag. Dingan tinanto ni Gepanulusun a ano man i peyedi de. Tinumubeg i Mag-aalage ide a, "Iwina a taporan ay de dibilew ni Katipong a lugel a paagow de lugel ni genggeng. I agta ide a pekita yu ay sinumila ide dena ta mulumahedep pati an malawa i matud a bektas, ta inesip de ay maparipari pa i bektas a iwina. Misan ay dinakop ide ni genggeng ta binulag na ide dingan inikag na ide de taporan tangani an de pekita i paagowen de. Kanya hanggen naho ay natulutotul ide dena."



Nagkapatangos a te kalbi i Gepanulusan pati  
Pag-asa ta maginon i yinadi de pala.



Dingan kita ko de pangnenop a inikag ni mag-aalage ide Gepanulusun de pintohan ni taporan de sidong ni kalasan ta peseling de i disalad ta kita de i malot a masakut a asuk pati dilab a ta malot a masakut a bo. Ta dingan inikna de i gealaloy ni hedep de disalad ta tinanto de ti ano inon. Tinumubeg i Mag-aalage ide a, "I oyo a lugel a deretsu de Impiyerno ay kinangan ni pesan a gesabi ide ay Gepanulusun misan eyen."



Nano ay buot nide Gepanulusun a notuloy ta sinumut i Mag-aalage ide hanggen de pagotan ni isin pa a kalasan a te ngalan a Tallang.

Dingan inumaan de ide ni teleskopiyo ta pesabi de, "Lawagin yu de oyo ta kekita yu i pintohan ni benwaan ni Hari. Misan linawag ni Gepanulusun pati Pag-asa ay an de pekita a piyon ta gekinkin i kumut de. Misan ay kasta kinta de i pintohan ta kinta de i tallang.



Ay dingan ide tinumotul ay biniyen ide ni isin de mag-aalage ide ni papel a getodu ni bektas ta un isin pan ay pepapag-engat na ide de Migpodi ni An Matud. Un katiluwon pan ay sinabi na a wet ide nagkapede de lugel a Inkantu. Ta un kaapat pan ay i sinabi na dide a, "Mapa dikamo tebe i kosa a tabeng ni Makedepat."



Nano ay kinta ko de pangnenop i aduwa a  
getotul a padolog de kalasan. Ay dingan  
natagbu de i agta a te ngalan a An Te  
Katinggesan ta eya ay getotul de likoliko a  
bektas a inumapo de benwaan a Maditas a  
Innawa. Misan ay paagow pala eya de bektas a  
pesilan ni aduwa. An te katinggesan eya  
tungkul de kamatoden misan ay de esip na ay  
katinggesan na i pesan. Misan nagtodu a  
masakut i aduwa tungkul de kaligtasan a matud  
ay an getalinga eya ta de esip na ay  
katinggesan na i pesan. Dingan winalat de  
eya.



Tinumuloy ide de paagowen de. Dingan  
dinumatong ide de madumos a masakut a lugel  
ta kinta de i isin a agta a te ngalan a  
Naampungang a ginapus ni pito a libong ta  
pinelit de a inadde de pintohan a te  
gepakatakut a asok pati dilab. Nano ay te  
gepo a gekinkin ide Gepanulusun.



Pagkatakeg ninon ay natandean ni Gepanulusun i sinumapit de isin a agta a te ngalan a Kolang i Pagpanulusun. Ta nagsabi eya de ayun na a, "Te tiluwon a tulisan a te ngalan a i An Pepanulusonan, i Takot pati i Te Kasalanan ta bobuno de tebe i Kolang i Pagpanulusun Na. Misan ay salamat ta dinumatong i Te Kalbi ta tinakut na ide."





Nun tinumuloy pa ide ay napaabut dila dide i An Te Katinggesan hanggen nakadetong ide de nagsanga di un bektas ta an de katinggesan i bektas a matud. Ta linanean ide ni isin a lalaki a te bedu a malapsay ta tinanto na ide a bekot ta duman ide kauluuddi.



Ay tinubeg ide a, "Ikami ay paagow de langot misan ay am mi katinggesan de oyo a aduwa a bektas i matud." Ay dingan sinabi na a, "Sumut kamo deko ta duman ok paagow."



Kanya sinumut ngani ide diya misan i  
bektas a pineta na ay likoliko a masakut ta  
katinggesan de a an ide palane ta palayu ide  
de paagowen de.



Ta pati tambing dila ide a nasakloben ni pokut ta misan ano i peyedi de tangani makabut ide ay an ide gepakabut.

Ta kinta de pala a nadegdeg un bedu ni lalaki a malapsay dingan katinggesan de a nadeya ide ta sinabi de 'a, "Katinggesan ko nano a nagkamali kitam. Ang kita mangani pepapag-engat ni mag-aalage ide de agta a oyo."



Misan naloy ide de disalad nun pokut  
dingan kinta de i isin a agta a gepakaingap a  
palane dide misan ay te panlapdit. Dingan  
sinede na un pokut ta un aduwa ay nakabulwag.  
Dingan sinabi na dide a, "I inabut yu a agta  
ay i te ngalan a Migpodi ni An Matud ta an  
nun matud a mag-aatid ni Makedepat ta napatud  
na a bobowon i sadile na a nandedeya de agta  
a magi anghel a te gepakaingap.



Kanya pinaobbob na ide ta linapdit na tangani wet ide gekamali a liwet. Dingan sinabi na a, "Umabut kamo deko ta getodu ok dikamo ni matud a bektas tangani ang kamo nalagelag." Ta nun duman ide de bektas a matud ay winalat na ide.



Misan ay nun maloy ay kinta de a gelane  
dide i agta a te ngalan a An Te Makedepat ta  
inumapo eya de bukuḍ a bektas. Ta tinanto na  
ngan ide ti deno ide paagow. Dingnan  
tinubeg de eya a, "Ikami ay paagow de  
langot a nakang de benwaan ni Hari."



Misan ay pagkaikna na de inon ay nagilok a masakut ta sinabi na a, "Ay talage i pesabi yu a iwina a lugel ay an te dio misan deno a putok." Sinabi ni Gepanulusun a, "Ayset te duman ngani de nadetong a panahon." Dingan sinabi ni An Te Makedepat a, "Ay naloy a panahon a linawag ko iwina misan hanggen nano ay ang ko kinta ta naampulang ok di de inapoan ko a lugel ta te pag-asa ok la de winalat ko ide." Nano kinatinggesan ni aduwa a i agta a oyo ay binulag ni Satanas.





Dingan winalat de ngani un laki a An Te Makedepat ta nakadetong ide de isin a lugel a Inkantu ta ide ay petungka a masakut. Sinabi ni Te Pag-asa a, "Magpaimloy kitam ngona ta mapede a tuloy." Misan ay sinabi ni Gepanulusun a, "Am mo mangan nagkaisipan a sinabi ni isin de mag-aalage ide a wet kitam napede de lugel a Inkantu." Dingan nasurutsurotan ide tungkul de kapangyedihaan ni Makedepat tangani wet ide napapede.



Pagkasila de iwina a lugel ay linumigoy i  
te Pag-asa ta kinta na i An Te Kaktinggesan a  
napaabut dide ta inilat de ngan eya.



Sinabi ni Gepanulusun diya a, "Dumio ka ta sumabe ka bekot ta napaabut la a tuloy dikami." Sinabi ni An Te Katinggesan a, "Pabiyaan ok yu ta buot ko a nototul a lalan." Tinanto eya ni Gepanulusun a, "Papalano man i pagpanulusun mo de Makedepat." Tinumubeg i An Te Katinggesan a, "Piyon i esip, innawa ko pati piyon i edup ko ta geabut ok de dodul ni Makedepat."



Dingan sinabi ni Gepanulusun a, "Magi oyo i sinabi de surut nun Makedepat tungkul de innawa tam a, 'An te misan isin a agta a te sukul a kapiyonan a ugeli de pekita ni Makedepat.' I ngalan mo ay An Te Katinggesan ta talage a an yu katinggesan i misan ano a tungkul de Panginoon tam a Hisu Kristo pati i yinadi na tangani malenis i agta de pekita ni Makedepat." Ay tinumubeg i An Te Katinggesan a, "Misan ay anak yu kapadepade a gepanulusun ay anak pan te malot de innawa ko ta kapadepade ok yu pala a piyon."



Sinabi ni Gepanulusun a, "An te misan isin a agta a geabuya de Hisu Kristo be an la paabuya ni Ama na, ta depat a abuyenan mo i kasalanan mo ta lumane ka de Panginoon a Hisus tangani wet ka podusahan." Misan ay sinabi ni An Te Katinggesan a, "Set ay maparipari kamo pan ang ko ikamo peabut kanya maona kamo di ta nainapoan ok di."



Nano ay nakatakeg ide de putok a Inkantu ta sinumilong ide de masampat a lugel ta ide ay nagkasalig dio ta masampat a masakut i pesan. I oni ni manga manok ide ay magi kanta pati kinta de pala i masampatin a bulaklak ta i lugel a oyo ay getipa i adow misan abi.



Ta dio ngani ay pekita de i lugel a  
paagowen de. Ta natagbu de duman i makmuk a  
anghel a gepakaingap a gepasiyal ta i pesan a  
peasaan de ay an te kolang duman.



Nano ay nun alane di ide de benwaan ay kinta de ay masampat a masakut ta yinadi yo de mahalagein a beto ta i kulukarsade duman ay ginto. Ta inikna de i busis a inumapo de benwaan a gesabi a, "Alane di i kaligtasan yu ta dinumatong kamo de bilos yu."





Nun alane pa ide ay kinta de i manga kew  
a te makmuk a anak pati kinta de pala i lanut  
a obes. Ta tinanto de un getarabeho duman a,  
"Hardinan man yo ni ino?" Ta tinumubeg eya  
a, "I oyo ay hardinan ni Hari ta yinadi na  
yo tangani te kasampatan a innawa i pesan a  
getakeg dio a paagow de benwaan na."



Dingan inikag na ide de hardinan tangani  
namangan ide ni misan ano a buot de.  
Pinakita na dide un pesilan nun te adi be  
getotul eya de hardinan. Dingan nagpaimloy  
ide duman a napede.



Nun ginumiyus ide ay tinumotul ide a  
paagow de benwaan ni Hari misan ay an de  
nagkapelawag i benwaan ta gepakaingap a  
masakut dehil de ginto.



Nun alane pa ide ay te natagbu ide a aduwa a anghel a te bedu ni gepakaingap a magi ginto. Pati pan i mukha de ay gepakaingap pala a magi adow. Ta tinanto ide ni manga lalaki a oyo a, "Deno kamo inumapo?" Dingan nagpaliwanag i Gepanulusun pati ayun na tungkul de lugel a inapoan de. Sinabi nun anghel a, "Ay te isin pa a kahedepan dingan kamo pa nakadetong de benwaan a buot yu a nadetong." Dingan sinotan de ide hanggen de kinta de i pintohan ni benwaan a paagowen de.



Nagkasalig i aduwa nun kinta de un pintohan misan ay te hanga a orat a depat a sabusabuan de ta an te tulay i orat a iwina pati libtong a masakut.

Talage an de katinggesan i yeyedi de hanggen pelawag de un orat. Misán ay sinabi ni manga lalaki a, "Depat a nasabusabu kamo tangani makadetong kamo de pintohan ni benwan." Misán ay nakatakut ide a masakut nun te gepo ide a gesabusabu.



Ay dingan nun ide ay te gepo a gelusong  
nun de orat ay i Gepanulusun ay te gepo a  
gelinod ta inolang na de ayun na a,  
"Tabengan ok mo ta nelinod ok."



Misan ay linibeng eya ni Te Pag-asa a sinabi na a, "Wet ka natakut kabinsa ko ta piyon pan la i kalibtongan i."

Misan ay sinabi ni Gepanulusun, "Ay nagkalanean ok ni kalibunan kanya ang ko kekita i benwaan ni Hari." Nano ay talage ay naeyen di i esip na.



Misan ay namas pa a hanga i takot ni Gepanulusun ta sinabi na a, "Talage a ang ko kekita i benwaan ta nelinod ok di." Ta nalipatan na i kosa a tabeng pati kasampatan a innawa a geapo de Makedepat.





Kanya nahedepan i Te Pag-asa a gealage de ulo ni Gepanulusun. Misan i Gepanulusun ay nagkatakut a masakut hanggen gepaliwanag i Pag-asa tungkul de Hisus ta sinabi na a tuloy a, "Tibongan mo i innawa mo ta tatabengan kitam ni Hisu Kristo" Ta kasta tinumibong i innawa ni Gepanulusun.

Ta angan naloy ay nakasikad di i Gepanulusun de putok ta ide ay nakasaka di. Nun duman ide de dipa ay kinta de i aduwa a te bedu a gepakaingap ta geilat ide duman ta binati de ide Gepanulusun ta sinabi de, "Ikami ay manga anghel ni Makedepat a dinodul a getabeng de manganak na."



Nano ay i benwaan a oyo de langot ay de  
pagotan ni kalasan misan ay am pan ide  
nahedepan a sinumakat ta tinabengan pan ide  
ni aduwa a anghel.



Talage a tambing ide a nakadetong de  
pintoan a te natagbu ide ni makmuk a  
gepakaingap. Ta sinabi ni aduwa a anghel de  
kakmukan duman a, "Dio i aduwa a te buot a  
gepanulusun de Makedepat nun duman pa ide de  
putok ta winalat de i pesan a kasalegen a  
geapo de pagyedi de putok dehil de  
pagpanulusun de de Makedepat."



Duman pala i kamakmukan a gepaoni ni paoni  
pati manga gekanta ide dehil de salig de a  
nakdetong de benwaan ni Hari i Gepanulusun  
pati Pag-asa.



Misan ay i Enok, Ilias pati Moises ay inumusdong ide de sidong ta gepakalawag ide nun geditong un aduwa ta sinabi de a, "I oyo a aduwa ay dinumatong ngani ta dehil de buot de a getaan de Hari tam ay nagtiis ide ni sadisadi a kahedepan."



Nano nun dinumatong ide de pintohan ay binoy de i katibeyen de a inumapo de megut a pintohan de gebentay ta inon ay inadde nun bentay de Hari. Ta nun besain na ay sinabi na a, "Deno man ide?" Ta sinabi nun gebentay a, "Ay geuddi ide de pintohan." Dingan sinabi ni Hari a, "Kayesan yu i pintohan ta ikagin yu dio."



Nano ay kinta ko de pangnenop a de pagsilong de ay loktat ide a nabowon ta nabeduan ide ni malapsay a masakut a gepakaingap a magi ginto. Ta biniyen de pala ide ni pantugtug pati suklung a mahalagein. Ta i pesan a kampana duman ay pepatinog dehil de salig ni pesan duman. Ta sinabi de dide a, "Sumilong kamo ta makikasalig kamo de Panginoon tam." Dingan gekanta pala i Gepanulusun pati Te Pag-asa ta i kanta de ay, "Pagpodi, paggelang, gepakaingap pati tibong diya a gelipa de piglipaan/pati de Anak a Topa magpakapide paman." Pagpakita 5:13.



Misan ay nun peesip ko i pesan a oyo ay linumingoy ok ta kinta ko i An Te Katinggesan a paapo nunde orat. Misan ay an eya nahedepan a magi kakmukan a sinumila duman ta pinasakoy eya de bengka ni isin a agta a te ngalan a An Matud a Pag-asa."





Dingan pagkasabusabu ni An Te Katinggesan  
ay sinumakat eya ngani de pagotan misan ay an  
eya te natagbu.



Nun dinumatong eya de pintohan ay nagtuktuk eya. Kanya tinanto ni aduwa a anghel a magi oyo, "Deno ka man inumapo pati ano i buot mo?" Tinumubeg eya a, "Ako ay nakisalo de Hari nun eya ay nagtodu pa de benwaan mi." Ay dingan inaged ni Anghel ide i katibeyen a nalukut misan nagulugepgep eya ay angan te duman.



Nano ay dinumuman i aduwa a anghel de Hari ta sinabi de, "Te isin a agta a dinumatong la a te ngalan a An Te Katinggesan misan an eya te katibeyen."

Dingan sinabi nun Hari a, "Gipusin yu i kumut na pati singit na dingan wewitik yu eya de Impiyrno ta an eya matud a gepanulusun."



Dingan yinadi de a magi sinabi ni Hari  
dide ta inikag de eya de pintoan a paagow de  
Impiyerno ta winitik de i An Te Katinggesan  
duman.

Ta duman ko ngan kinta a misan nakadetong  
kitam de langot be ang kitam te katibeyen ay  
wewitik ngani de Impiyerno.

Ay dingan napagiyus ok nun nanon ta  
gepangnenop ok mangani.